

მ რ ი

№ 11

შ ი ნ ა ა რ ს ი:

ქ რ ი ვ ნ ე უ ლ ი

გულ-წითელა, სელმა ლაგერლეფისა
სსსარგებლო გართობა—შინაურისა; ნუ მომაგონებ!
დექსი—ი. გრიშაშვილი-სა; ზეინაბის გასმართლება—
გ. რობაქიძის სიტყვა; შანტკეღერი ე. რასტანის. თარგმ.—გ. გვაზავასი;
აღსდგა! დექსი—ს. ფაშალიშვილისა; ნუცალსანი—
ივ. ბუქურაულისა.

კვირა, 18 აპრილი საზოგადოებრივ, სამეცნიერო და სალიტერატურო ჟურნალი 1910 წ.

გულ-წითელა

არაკი ქრისტეს შესახებ.

ქ-ნ სელმა ლაგერლეფისა

(თარგმანი)

—:—

ეს მაშინ იყო, როდესაც უფალი აჩენდა მართო ცასა და დედა-მიწას-კი არა, არამედ პირუტყვებსა და მცენარეებსაც, რომელთაც მაშინვე არქმევდა თავთავის სახელს.

ბევრი თქმულება დარჩა იმ დროის; და ყველა რომ ცნობილი გახდეს, მაშინ ყოველივე, რაც-კი გაუგებარია ქვეყანაზედ, ცხადი გახდებოდა.

აი ერთხელ უფალი იჯდა სამოთხეში და ღებავდა ფრინველებს, არ ეყო წამალი, ასე რომ ნარჩიტა თითქმის შეუღებავი დარჩებოდა, რომ გამჩენს ყველა საღებავის წასასმელები მაზედ არ გაეზოცა.

ვირსაც სწორედ მაშინ ერგო მისი გრძელი ყურები, რადგანაც ვერაფერის გზით ვერ დაენახსოვრებია დარჩმეული სახელი. გადაადგავდა თუ არა რამდენიმე ნაბიჯს, ავიწყლებოდა იგი და სამჯერ უკანვე ბრუნდებოდა და ჰკითხულობდა, რა იყო მისი სახელი? მაშინ ჩვენმა უფალმა ცოტა მოთბინება-კი დაჰკარგა, წაავლო ყურებში ხელი და უთხრა:

— შენი სახელია — ვირი, ვირი, ვირი.

და თანაც ამის თქმაზედ, ყურებში ეწეოდა, სანამ კარგად არ ჩაესმა ხმა და არ დაინახოვრა თავისი სახელი.

იმავე დღეს უფალმა ფუტკარი დასაჯა. გაჩენისათანავე, ფუტკარი თავლის შეგროვებას შეუდგა, ხოლო პირუტყვნი და ადამიანნი, თავლის სასიამოვნო სუნზედ, მიდიოდნენ საგემებლად. მაგრამ ფუტკარს მართო თავისთვის უნდოდა ყველაფრის შენახვა და იგი ყველას ჰკბენდა, ვინც-კი თავლის ფიჭას მიუახლოვდებოდა. დანახა თუ არა უფალმა ეს, მიიხმო ფუტკარი და დასაჯა იგი.

— მოგეცი ნიკი თავლის შეგროვების—უთხრა მას უფალმა, — მაგრამ იმისი ნება კი არ მომიცია შენთვის, რომ შეუბრალებელი იყვე შენი მოყვასისადმი. მაშ დანახსოვრე, — იცოდე მოკვდები, თუ უკბინე ვისმე, ვინც მოინდომებს შენი თავლი გახინჯვას!..

სწორედ მაშინ იყო, რომ ჰიქინა დაბრმავდა, და ჰიანჰველამაც ფრთები დაჰკარგა; იმ დღეს ბევრი რამ სასწაული მოხდა.

უფალი, დიდებული და მშვიდი, მთელ დღეს სამოთხეში დარჩა, იგი აჩენდა, სასიცოცხლოდ აღვიძებდა; და სალამოს ერთი პატარა რუხი ჩიტის გაჩენა მოაგონდა.

— გახსოვდეს, რომ შენ გულწითელა გქვია! — უთხრა უფალმა ჩიტს. დაისვა იგი ხელის გულზედ და იგიც გაფრინდა.

ჩიტმა ვარეშემო შემოიფრინა, დედა-მიწა გაიცნო, რომელზედაც გარდაწყვეტილი ჰქონდა მას ცხოვრება, და შემდეგ თავის თავის დათვლიერებაც მოინდომა. მაშინ დანახა, რომ მთლად რუხი ანუ ნაცრის ფერი იყო და გულიც-კი ნაცრის-ფერი ჰქონდა. გულწითელა ტრიალებდა და ყოველის მხრით უკვირდებოდა თავის თავს წყალში გამოსახულს, მაგრამ ვერცერთ წითელ ფთას ვერ ხედავდა თავის ტანზედ. მაშინ უკანვე მიფრინდა უფალთან. უფალი იჯდა მოწყალე და მშვიდი, მისი ხელებიდან ბელურები გამოდიოდნენ და თავს დასტრიალებდნენ, მტრედები მხრებზედ დაჰლულუნებდნენ და მის ფერხთა ვარეშემო ვარდი, შროშანი და სხვადა-სხვა ყვავილი ჰყვავოდა.

პატარა ჩიტის გული შიშით თრთოდა, მაგრამ მაინც მიფრინდა უფალთან უფრო ახლოს, უფრო ახლოს და ბოლოს, მის ხელზედ დაეშვა.

მაშინ უფალი შეეკითხა დაბრუნების მიზეზს.

— ერთი რამე უნდა მეკითხა შენთვის, — მიუგო ჩიტმა.

— რა უნდა გეკითხა? — უპასუხა უფალმა.

— ნეტავი რატომ მქვია გულწითელა, როდესაც მთლად ნაცრისფერი ვარ ნისკარტიდგან მოკიდებული კულის ბოლომდე? გულწითელა რატომ მქვია, როდესაც არც ერთი წითელი ბუმბული არ გამაჩნია?

ჩიტმა მუდარით შეხედა უფალს თავის პატარა შავი თვალებით და მიიბრუნა თავი. გარეშემო ხედავდა ხოხბებს, წითლებს, ვარაყის წინწყლებით დაფარულთ, თუთიყუშებს, ბრწყინვალე წითელფრთებიანის კისრით, წითელ ბიბილიან მამლებს, რომ ოქროსფერ თევზებზედ და ვარდებზედ არაფერი ვსთქვათ. და, რასაკვირველია, აზრად მოუვიდა, რომ გულზედ პატარა წითელი ხალიც-კი საკმარისი იყო, მშვენიერი ჩიტი იქნებოდა და თავისი სახელიც მას ღირსეულად ექნებოდა დამსახურებული.

— რად მეძახიან გულწითელას, როდესაც მთლად ნაცრისფერი ვარ?—კიდევ იმეორებდა იგი და ელოდა, რას ეტყოდა მას უფალი:

— „უჰ, ჩემო კარგო, სრულებით დამავიწყდა წითლად შემეღება შენს მკერდზედ ფრთები. მოიცა, ეხლავე გავასწორებ ამას“.

მაგრამ უფალმა გაიღიმა და მითხრა:

— გულწითელა გიწოდებ და დაგერქმევა კიდევ ეს სახელი. მაგრამ შენ თვითონ უნდა დაიმსახურო მკერდზედ წითელი ფრთები.

ამ სიტყვებით მან ასწია ხელს და ხელახლად გააფრინა ჩიტი. დაფიქრებულმა ჩიტმა იწყო ფრენა სამოთხეში. რა უნდა ჰქნას ასეთმა პატარა ჩიტმა წითელი ფრთების მოსაპოვებლად?

ერთი რამ მოუვდა აზრად, — ასკილის ჯაგში ბუდის გაკეთება. თითქოს, იმას ელოდა, რომ ყვავილების ფოთლები მკერდზედ დაეცემოდნენ და მას თავის ფერს გარდასცემდნენ.

* * *

აურაცხელმა წელიწადმა გაიარა ამ უბედნიერეს დღის შემდეგ. დიდი ხანია პირუტყვებსაც და ადამიანებსაც მიეტოვებინათ სამოთხე და მთელ დედამიწას მოსდებოდნენ. ადამიანთ ესწავლათ მიწის დამუშავება და ზღვაზედ ცურვა, ტანსაცმელისა და სადგომის გაკეთება, შესანიშნავ ტაძრებისა და ძლიერ ქალაქების აგება, როგორც მაგალ. თები, რომი და იერუსალიმი.

და ხელახლად ვათენდა დღე, რომელიც დიდ ხანს სანახსოვროდ დარჩება კაცობრიობის მატრიანეში. ამ დღეს, დილით გულწითელა იჯდა დაბალ, მოტიტვლებულ ბორცვზედ იერუსალიმის კედლებთან და ბუდეში მყოფ თავის ბარტყებს უგალობდა.

გულწითელა უამბობდა თავის ბარტყებს შექმნის სასწაულებრივ დღის ამბავს, და როგორ არქმევდა უფალი ყველას სახელებს. ამ ამბავს თვითელი გულწითელა თავის ბარტყებს მოუთხრობდა იმ პირველ ჩიტისგან დაწყებული, რომელსაც თვითონ

მოესმინა ღვთის სიტყვა და რომელიც გამოფრენის ხელებიდგან.

— და დახეთ, მწუხარედ წარმოსთქვა მან, მას შემდეგ ამდენმა წელიწადმა გაიარა, ამდენი დღეა დი დასტკნა, კვერცხებიდგან ამდენი ბარტყი გამოიჩეკა, რომ მათი დათვლაც კი არავის შეუძლია, გულწითელა-კი ისევ პატარა, ნაცრის-ფერ ჩიტად რჩება, იგი ჯერაც ვერ ახერხებს წითელი ბუმბულის შექმნას.

პატარებმა განივრად გააღეს ნისკარტი და ჰკითხეს, სცდილობდნენ თუ არა მათი წინაპარნი დიდებულ რისმე ჩადენას, რომ მოეპოვებიათ ეს დაუფასებელი წითელი ფრთები.

ყველამ მოვიმოქმედეთ, რაც-კი შეგვეძლო,— მიუგო ჩიტმა, — მაგრამ ვერც ერთმა ჩვენგანმა საწადელს ვერ მივალწიეთ. პირველი გულწითელა შეხვდა ერთეულ მეორე თავის მსგავსს ჩიტს და ისე ძალიან შეუყვარდა იგი, რომ გული ვნებით უღელავდა. „აი, იფიქრა მან,—ეხლა-კი მესმის: უფალს ჰსურს, რომ ძალიან, ძალიან მიყვარდეს და მაშინ ჩემს მკერდზედ ფრთები შეიღებება იმ ცეცხლით, რომელიც ჩემს გულში ანთია“. მაგრამ იგი ვერას გახდა, როგორც ჩვენ ყველანი ვერას გავხდით და როგორც ვერც თქვენ გახდებით რასმე.


ბარტყები მწუხარედ ჰყიოდნენ, და დაიწყეს კიდევ იმის დარდი, რომ მათ პატარა ბუმბულიან კისრებზედ წითელი ფრთები აღარ ექნებოდათ.

— ჩვენ გალობის იმედიც-კი გვქონდა,—განაგრძო საუბარი ხნიერმა ჩიტუნამ.— პირველი გულწითელა ისე ჰგალობდა, რომ მისი გული აღმაფრენით ჰთრთოდა, და თანაც ჰფიქრობდა იგი: „ეს სიცხოველე, რომლითაც მე ვჰგალობ და რომელიც ჩემს სულშია, ჩემს ფრთებს უთუოდ წითლად შეღებავსო“. მაგრამ იგი შესცდა ისე, როგორც ჩვენ ყველანი ვსცდებოდით და როგორც თქვენც შესცდებით.

პატარების ნახევრად ტიტველ ყელიდგან საბრალო ჰყივილი აღმოჰხდა.

— ჩვენ კიდევ ჩვენი გულადობისა და გამბედაობის იმედი გვქონდა, — განაგრძო ხნიერმა ჩიტმა, — პირველი გულწითელა უკვე მამაცად ებრძოდა სხვა ფრინველებს და მისი გული ცეცხლით იწოდა. „აი, ომის აღმურისაგან, რომელიც გულში მინთია, ჩემი ფრთები წითლად შეიღებებიანო“ — იფიქრა მან. მაგრამ იგი დიდათ სცდებოდა, ისე როგორც ჩვენ ყველანი, და ისე, როგორც თქვენ ყველანი შესცდებით.

პატარებმა მამაცად სწყიოდნენ, რომ იგინიც ეცდებიან აღთქმულის განხორციელებას, მაგრამ ხნიერი ჩიტი მწუხარედ უპასუხებდა, რომ ეს შეუძლებელიაო. რისი იმედი უნდა გქონდესთ, როდესაც ამდენი გამოჩენილი წინაპარი ვერას გამხდარაო?



რალა შეუძლიათ იმაზედ მეტი, რომ შეიყვარონ, იგალობონ და იომონ? რა შეუძლიათ?...

ჩიტმა ვერ დაამთავრა თავისი სათქმელი, რადგანაც იერუსალიმის კარებიდგან გამოვიდა ხალხის ბრბო და გამოემართა იმ ბორცვისაკენ, სადაც მისი ბუდე იყო. აქ იყვნენ მხედარნი ამაყ ცხენებზედ შემსხდარნი, შუბიანი ჯარის-კაცნი, ჯალათნი ლურსმებითა და ჩაქუჩებით, აქ დიდებულად მოდიოდნენ მღვდელნი და მსაჯულნი, მოდიოდნენ მტირალი დედაკაცები, ხოლო ყველასკი წინ მოუძლოდა ჩამოხეულ მაწანწალათა მყვირალი ბრბო.

პატარა ნაცრისფერი ჩიტი აკანკალებული იჯდა ბუდის პირად. იგი ჰშიშობდა, რომ გადასთელავდნენ ასკილს და მის პატარა ბარტყებსაც მოჰკლავდნენ.

— იცოდეთ, — უთხრა მათ, — კარგად მიეკარით ერთი მეორეს და არ გაინძრეთ! აგერ ცხენი პირდაპირ ჩვენსკენ მოდის! აგერ ჯარის-კაცი მოდის, ფეხსაცმელი რკინით აქვს ამოჭედილი! ჩვენსკენ მოდის მთელი ბრბო! — ჩიტი უცებ დადუმდა და მიიყუჟა. თითქმის მოსალოდნელი განსაცდელიც კი დაავიწყდა მას.

უცებ ბუდეში ჩავარდა და გადააფარა ბარტყებს ფრთები. — არა, ეს მეტად საზარელი რამ არის, — წარმოსთქვა მან, — არ მინდა, რომ ეს დაინახოთ, — სამი ავაზაკი მიჰყავთ ჯვარზედ ასაკრავად.

და შემფოთებით შლიდა ფრთებს, რომ ბარტყებს ვერაფერი დაენახათ. იმათ ესმოდათ მხოლოდ ჩაქუჩის მძლავრი ცემა, მწუხარების ოხვრა და ხალხის ველური ღრიალი. გულწითელა თვალს არ აშორებდა ყოველივეს, რაც-კი ჰხდებოდა. შიშისაგან გაშტერებული თვალები ვერ აეშორებინა სამი უბედურისათვის.

— რა შეუბრალებელი არიან ადამიანები! — ჰფიქრობდა ჩიტი. — ის აღარ იკმარეს, რომ ეს სამი საბრალო ჯვარს მიაღურსმეს, არა, ერთ მათგანს თავზედ ეკლის გვირგვინიც-კი წამოაცვეს. ვხედავ კიდევ, ეკალი როგორ უკაწრავს შუბლს და სისხლს ადენს. ეს კაცი-კი ისეთი მშვენიერია, მისი გამოხედვა ისეთი მშვიდია, რომ არ შეიძლება, იგი ადამიანს არ შეუყვარდეს. რომ ვხედავ, როგორ იტანჯება, ასე მგონია, თითქოს გულში მჭრელი ისარი მესობოდეს.

ჩიტი თანდათან უფრო და უფრო მეტად ჰგრძნობდა ეკლის გვირგვინიან ჯვარცმულისადმი სიბრალულს.

— ჩემ ძმად, არწივად რომ ვყოფილიყავი, — ჰფიქრობდა იგი, — ხელებიდგან ამოვაცლიდი ლურსმებს და მძლავრის ბრძკალებით გავჰფანტავდი მის მწვალელებს.

იგი ჰხედავდა, სისხლის წვეთები როგორ სდიოდა ჯვარცმულის შუბლს, და ველარ შესძლო ბუდეში დარჩენა.

— თუმცა პატარაც ვარ და სუსტიც, მაგრამ მაინც რამე უნდა გავურთიგო უბედურ მოწამულს იფიქრა ჩიტმა. ამოხტა ბუდიდგან და იფრინდა მალლა ცაში, თანაც ჯვარცმულის თავის ზემოდ განიერ წრეს უვლიდა.

დიდხანს იფრინა გარეშემო და ვერ ჰხედავდა ახლოს მიფრენას, რადგანაც იგი პატარა იყო, მშინაა ჩიტუნია, რომელიც არასოდეს არ მიახლოვებოდა ადამიანს. მაგრამ თან-და-თან გამამაცდა, სულ ახლოს მიფრინდა და ნისკარტით ამოაძრო ერთ-ერთი ეკალი, რომელიც ჯვარცმულის შუბლს შესობოდა. ამ დროს ჩიტის ყელს მოხდა ამ უბედურის წვეთი სისხლი. ამ წვეთმა უცებ მოიარა და შეუღება ჩიტს კისერზედ და მკერდზედ პატარა ნაზი ბუმბული.

როდესაც ჩიტი ისევ ბუდეს მიუბრუნდა, ბარტყებმა მიამახეს:

— მკერდზედ წითელი ფრთები გაქვს? ვარდზედ უფრო წითელია!

— ეს მხოლოდ წვეთი სისხლია იმ საბრალო კაცის შუბლიდგან, — მიუგო ჩიტმა. — წყალში რომ ტანს გავიბან, გაჰქრება.

მაგრამ რამდენიც არ იბანა ტანი პატარა ჩიტუნამ, წითელი ნიშანი მაინც არ გაჰქრა, და როდესაც ბარტყებიც წამოიზარდნენ, მათი კისერი და მკერდიც ალის ფერ წითლად იყო შეღებილი, და ასე მომდინარეობს ეს ჩვენ დრომდე.

ღ.



სასარგებლო გართობა.

—:—

ფრანგებს ერთი დიდებული მწერალი ჰყავდათ. დიდებული მწერალი ერთი კი არა, — ბევრიც ჰყავდათ, მაგრამ მე აქ მართო ერთზე მოგახსენებთ. ეს იყო იპოლიტ ტენი, რომელსაც სადღაც თავის ნაწერებში ერთი ფრიად გონივრული და საგულისხმიერო აფორიზმი აქვს გამოთქმული. „ისე სახიფათო არა არის რა, როგორც დიდი აზრი პატარა ტენის პატრონ ადამიანის გოგრაშიო“, — ამბობს იგი.

ტენი რომ დღეს ცოცხალი ყოფილიყო და ჩვენს ცხოვრება სცოდნოდა, ამ თავის აფორიზმის სიმართლეს მართოდენ „ქართული“ მასალითაც საკმაოდ დაამტკიცებდა და ჩვენც გესლიან იუმორს არ მოგვაკლებდა.

საბუთიც ექნებოდა. ევროპაში, მგონი, არ დარჩენილა არც ერთი „მოწინავე აზრი“ და „თეორია“, რომელიც ჩვენ ამ ბოლო ხანებში არ „შე-

გვეთვისებინოს“, მაგრამ ეს შეთვისება გამოდგა რაღაც უცნაური, რაღაც თავისებური და ბევრის მხრით „სახიფათო“ სწორედ იმ მიზეზით, რა მიზეზითაც ტენი დიდ აზრს სახიფათოდ სთვლის... პატარა ჭკუის ადამიანისთვის.

მაგალითად, ბევრ სხვა და სხვა მეცნიერულ თეორიებს შორის, ჩვენ გავიგეთ და „შევითვისეთ“ ევოლუციონური თეორიაც და ამის საშუალებით სულ „მარტივად“ ავხსენით და განვსაჯეთ ჩვენი ცხოვრების ყოველი ფაქტი და მოვლენა. ეს თეორია, როგორც იცით, ამტკიცებს და განმარტავს პროგრესის არსებობას, კაცობრიობის მუდმივ განვითარებასა და წინმსვლელობას. და, აი, ჩვენ ეს სადღაც და როგორღაც გავიგონეთ და ამით საზოგადოებრივ მოვლენათა ახსნა-დაფასებაც ხელად ვისწავლეთ. თურმე ქვეყნად „პროგრესი“ და „განვითარება“ ყოფილა, და რაც დრო მიდის, მით უფრო საზოგადოება წინ მიდის, — ვითარდება. ეს არ იცოდნენ ჩვენმა მამა-პაპებმა, — ასეთი უფიცები იყვნენ ის საცოდავები. დღესაც არ იციან ეს ჩვენმა „რეაქციონერებმა“, ე. ი. ნაციონალისტებმა, რადგან მათს გონებრივს წყვილიაღში მეცნიერების სხივს ჯერ კიდევ არ ჩაულწევია. იმათ არც კი სმენიათ მეცნიერების ეს უკანასკნელი („ახალი“) სიტყვა, რომ ყოველი დღე, ყოველი საათი და წუთიც კი პროგრესისა და, მაშასადამე, უმჯობესობის მომტანი არის. ამიტომ ცხადია, რომ ყველაფერი „ძველი“ დასავლობი არის, ხოლო ყველაფერი „ახალი“, ვითარცა „პროგრესისა“ და „წინმსვლელობის“ მომასწავებელი, — სასურველი და მოსაწონი.

ასე ვისწავლეთ ჩვენ, ქართველებმა, მეცნიერება და „ახალი აზროვნება“. ამიტომაც ქართულ უბადრუკობას სანუგეშოდაც კი მიიჩნია, როცა ჩვენში რაიმე „ძველი“ ჩვეულება ისპობა, .თუნდა ეს ჩვეულება თავის თავად სასარგებლოც იყოს და ღირსიც შენარჩუნებისა.

დღეს გვინდა მკითხველის ყურადღება მივაქციოთ ერთ ძველ ჩვეულებას, რომლის თან-და-თან მოსპობა განსაკუთრებით აღდგომის უქმეებში სჩანს ნათლად და ყველასათვის დასანახად. საჭირო არ არის მოხუცი კაცების გამოკითხვა, — სულ უკანასკნელი 20 წლის დაკვირვებაც საკმარისია იმის შესამჩნევად, რომ ჩვენში სააღდგომო დღესასწაული და გართობა ის აღარ არის, რაც წინად ყოფილა. რაც დრო მიდის, მით უფრო ამ დღესასწაულის მიგებებას ხალხის მხრით შნო და ლაზათი ეკარგება, და აკლდება ის თავისებურობა, რომელიც წინად ხალხის სულის სისაღეს ამხილებდა და თავისი მიმზიდველობით მაყურებელს ჰხიბლავდა და ესთეტიურად ატკობდა. როგორც წინად, ისე ახლაც მთელ აღდგომის კვირეს ხალხი უქმობს, მაგრამ განსხვავება ის არის, რომ წინად იგი დროს ფუჭად არ ატარებდა და

დღესასწაულის შესაფერად კიდევ ერთობოდა, დღეს კი უქმობს მხოლოდ და გართობა აღარ ეძიებოდა. თუ წინად თითქმის ყოველ სოფელში მწვენიერი სიმღერები და მხიარული კრიმანჭული გაისმოდა, გაჩაღებული იყო საჯარო ცეკვა, იმართებოდა ჯირითი და ბურთაობა, დღეს ყველა ეს მივიწყებულია ან, ყოველ შემთხვევაში, წინანდელის მკრთალ ნასახსაც კი აღარ წარმოადგენს. სწორედ ნაღველი აეშლება ადამიანს, როცა ახლანდელ დღესასწაულობას დააკვირდება: მთელი დღეების განმავლობაში ხალხი ან სვამს, ან ითრობა და ერთმანეთს თავ-პირს ამტვრევს, ან და მინდვრად გადის და მუნჯად ბატივით დაბლაღუნობს.

რა არის ახლანდელ დღესასწაულების უფერულობის მიზეზი? რად ეკარგება ხალხს გართობის შნო და ლაზათი? ჩვენის აზრით, მთავარი მიზეზი აქ თვით ხალხის შემეცნების ცვლილებაში არის მოსაძებნი. ქართული სოფელი დღეს ორის ელემენტისაგან შესდგება: ერთია — თუ შეიძლება ასე ითქვას — ელემენტი მკვიდრი, ანუ ადგილობრივი, მეორე — ელემენტი „მოქალაქე“ ანუ ეული. და, აი, სწორედ ეს მეორე ელემენტი არის ხალხისათვის ტანისა და მაგალითის მიმცემი. რამდენადაც მცხოვრებთა ეს „მოქალაქე“ ნაწილი მრავლდება სოფლად, იმდენადვე ხალხი ჰკარგავს თავისებურობას და ელევატრადიციულ ზნე-ჩვეულებას. და უნდა იცოდეთ, რომ სოფელი თავის შვილებს ბლომად აყენებს „მოქალაქეთა“ გზაზე. გლეხისა ან აზნაურის შვილები, ქალაქში ლაქიად, მუშად, ხელოსნად, ან ნოქრად წასული ან სრულიად უსაქმოდ მოხეტიალე; ადგილობრივ სკოლაში მოსწავლე ახალგაზდები, სხვა-და-სხვა ქალაქების სასწავლებლებში მოსწავლე ქალ-ვაჟნი, ისევე სოფლის მკვიდრთაგან წარმომდგარი ინტელიგენცია, აგრეთვე ადგილობრივი გლეხი ან აზნაური, ქალაქებში მოვაჭრედ ან მოიჯარადრედ წასული და მაშასადამე, „ქვეყნებ მოვლილი“, — ყველა ესენი არიან სოფლის ის „მოქალაქენი, რომელნიც სოფელს ძველს ელფერს უკარგვენ და, სხვათა შორის, თავისებურ სადღესასწაულო გართობასაც ავიწყებინებენ.

სკოლა ბავშვს პატარაობიდანვე აწყვეტინებს მშობელ-მეზობლების კავშირს, აშორებს ეროვნულ ნიადაგს და უკარგავს საიმისო ხალისსა და გემოვნებას. ახალგაზდამ აღარ იცის არც ეროვნული ცეკვა, არც სიმღერები. ასევე შორდება ამ მხრივ მშობლიურ ნიადაგს ის მუშა ნოქარი ან ხელოსანი, რომელიც უმთავრესად ქალაქებში ეძებს არსებობის საღსარს და თავის სოფელს მხოლოდ სტუმრად ეწვევა. დამახასიათებელი თვისება ყველა ამ „მოქალაქეთა“ — ნასწავლთა და უსწავლელთაც — ის არის, რომ იმათ თავიანთი „მოქალაქეობა“ უფრო მაღალ ღირსებად მიიჩნიათ, ვიდრე „სოფლელობა“ და ამიტომ გვერდს უქცევენ ყველაფერს, რაც

ვითომდა ამ „სოფელელობის“ და მაშასადამე, „ტეტიაობის“ მომასწავებელია. გემნაზიასა ან პროგემნაზიაში მოსწავლე ქალს, მაგალითად, რომელიც სააღდგომოდ სოფელში მიდის დედ-მამასთან, თავის დღეში ფიქრად არ მოუვა, თუნდა რომ კიდევ იცოდეს, თავის სოფელში ლეკური ჩამოუაროს და ამგვარად დღესასწაულის დროს სოფელს საჯარო გართობაში მხარი დაუჭიროს. მისი წარმოდგენით, ეს მისი კულტურის შეუფერებელი საქმე იქნება თავის სოფელში ისეთი ცოდნა გამოიჩინოს, რომლის გამოჩენა მის მეზობელსაც შეუძლიან. სამაგიეროდ, იგივე ქალი „პოლკას“ სიამოვნებით იცეკვებს, რადგან ეს „პოლკა“ მას ქალაქიდან აქვს მოტანილი და სოფელელებისთვის უცხო და უცნაური არის. ქალაქიდან სოფელში სტუმრად მოსული „გათვითცნობიერებული“ მუშა, ან ხელოსანიც აქ თავს „მალა“ იჭერს და განსაკუთრებულის „სიდარბაისლით“ იქცევა; მას არც ერთი ის საგანი არ აინტერესებს, რაც სოფელელის ცხოვრების წერილმან ინტერესს შეადგენს. თავის გუშინდელ მეზობელს იგი უცქერის როგორც მოწაფეს, რომელსაც მან ჰკუთუნდა ასწავლოს, ქვეყნის ავკარგი გააგებინოს, მასწავლებლობა გაუწიოს და „გათვითცნობიეროს“ და არა როგორც სულით განუყოფელ ძმასა და ორგანიულ ნათესავს. „ქვეყნებმოვლილი“ მოიჯარადრეც სოფელში ნამდვილი ფილოსოფოსი არის და ყველაფერს „სოფელურს“ უვიცობად და გაუნათლებლობად სთვლის. ერთის სიტყვით, „მოქალაქეთა“ ელემენტი სოფელში — ასე ვსთქვათ — მოწინავე წოდებაა და გონებრივ არისტოკრატიად არის მიჩნეული.

ადილი გასაგებია, რომ ამ ელემენტს შესაფერი გავლენა აქვს საერთოდ სოფელელთა გონებრივ შემეცნებასა და ესთეტიურ გემოვნებაზე. ხალხი ყოველთვის იმ წოდებას ჰბაძავს, რომელიც მას თვისზე წარჩინებულად ჰყავს დასახული. რახან ნასწავლი და „გარედ გახედული“ ხალხი არც ჩვენს სიმღერებს ეტრფის, არც ჩვენებურ ცეკვა-გართობას ჰკადრულობს, მაშ სჩანს — მსჯელობს იგი — ყველაფერი ეს სიმდარის მომასწავებელი ყოფილაო, და, რასაკვირველია, თვითონაც სცდილობს გამოეთხოვოს იმგვარ ჩვეულებას, რომელიც ამგვარ სიმდარედ ყოფილა მიჩნეული. მე თვითონ ხშირად მილაპარაკებია ამ საგანზე სოფელში და ყოველთვის ერთი და იგივე პასუხი მიმიღია: „რა მუტრუკები ვიყავით, რომ ბუროის თამაშში თავ-პირს ვიმტვრევდითო. მაგრამ, რას იზამ, ჩემო ძვირფასო, მაშინ ჩვენში განათლება არ იყო, სწავლა არ გვქონდა და არც ნასწავლი ხალხი გვყავდა, რომ ჩვენთვის ჰკუთუნებოდათა“.

ასე თუ ისე, ყოველ შემთხვევაში ეს ერთი რამ აუცილებელია, რომ დღეს სააღდგომო დღესასწაულები ჩვენში, წინანდელთან შედარებით,

ყოველად უფერული და ულახათოა. მაგრამ ამ საგანზე ჩვენ ნარტო ამ ულახათობის გამოცხადებით არ დავიწყია ლაპარაკი, — თავისთავად დღესასწაულის უფერულობას მაინცა და მაინც დიდ აშბად არ ჩაეთვლიდით. მაგრამ საქმე ისაა, რომ ძველი ჩვეულების დავიწყებას უფრო საყურადღებო შედეგი ახლავს. სახელდობრ, გარებობებს წყალობით დავიწყებას ეძლევა სახალხო ლექსები, ჰქრება ქართული სამუსიკო კილოები, არ ინახება ეროვნული ცეკვა, არ ვითარდება პლასტიკა და ხალხს სრულებით ავიწყდება ისეთი თამაშობის ჩვეულება, რომელიც ფრიად საჭირო და სასარგებლოა ადამიანის ფიზიკურ და მორალურ სიმტკიცის განვითარებისათვის. ნურავის გაუკვირდება, რომ ძველ სადღესასწაულო გართობის დავიწყებას ამდენი ზიანი ახლდეს შედეგად. არცერთი ახალგაზდა არც ცეკვას, არც სიმღერას იმისთვის არ ისწავლის, რომ შემდეგ თავის სახლში მარტომ იმღეროს ან იცეკვოს. ერთიც და მეორეც მას უნდა ხალხში გამოსაჩენად. ქალაქში რომ კლუბები არ იყოს და ბალები არ იმართებოდეს, არცერთი ქალი არ ისწავლიდა ევროპიულ ცეკვას, რომლისთვისაც დღეს დიდ დროსა და ფულს ხარჯავენ. სოფელში კლუბების სამაგიეროა რამდენიმე დღესასწაული წელიწადში, როდესაც ხალხი მინდვრად გამოდის, ცეკვობს, მღერის და ერთობა. და როდესაც ეს ჩვეულება ჰქრება, ცხადია, მოზარდ თაობას ეკარგება ერთ-ერთი მთავარი მოტივი ცეკვისა და სიმღერების შესასწავლად. ამიტომაცაა, რომ ჩვენი სოფელი თან და თან ლატაკდება მუსიკისა და საზოგადოდ ესთეტიურ გემოვნების მხრით. სხვა განათლებულ ქვეყნებში აუარებელ ფულსა და შრომას ხარჯავენ სახალხო მუსიკის დასაცავად და ეროვნულ ხელოვნების შესანარჩუნებლად; აღზრდის საქმეში პირველ ადგილს უთმობენ ფიზიკურ ვარჯიშობას და ამიტომაც სხვა და სხვაგვარ სპორტისთვის ხარჯებს არ ერიდებიან. ჩვენ კი, არა თუ ხარჯებს არ ვეწვივით და ახლის შესაქმნელად თავს არ ვიტკივებთ, უკვე ისტორიულად შექმნილ ჩვეულებას არ ვიცავთ და ხალხს მასზე გულს ვუცრუებთ. ეს არის სავალალო სიბეცე, რომელიც ბოლოს და ბოლოს სანანურად გაგვიხდება, თუ დროზე ყურადღება არ მივაქცივით.

მაშ, ქრისტე აღსდგა, მკითხველო! მივულოცოთ ერთმანეთს ჩვენებურად, ძველებურად: სიმღერა-გალობლით, ცეკვით და ვარჯიშობა-თამაშით. მერწმუნეთ, ეს კარგი და სასარგებლოა ყველაფრით!

შინაური.



ნუ მომაგონებ!...

—:—

ნუ მომაგონებ იერუსალიმს,
ბრბოს, ბნელ-გარეწარს, იუდას ამბორს;
ნურც ცის ტატნობზე ვარსკვლავთა ციმციმს...
ნუ მომაგონებ გოლგოთას მთა-გორს.

* * *

ნუ გამახსენებ პილატეს ჯარსა,
ნურც მაგდალინელს, უღვთოდ წამებულს,
ნურც ურიასტანს, წამების ჯვარსა...
და ნურც შავ-გვირგვინს, ეკლით მოქარგულს.

* * *

ნუ მომაგონებ
აწმყოს და წარსულს...
ნუ, ნუ მალონებ...
ამაოდ ჰგონებ,
ვერ დაიმონებ
ამ ჩემს ამაყ სულს.

* * *

ნუ, ნუ მილოცავ აღდგომის დღეს, ნურც ჭრელ
გაზაფხულს,
ჩემგან ვერას დროს ვერ მიიღებ სამაგიეროს.
ოჰ, მითხარ, მითხარ: ხალხთ ყრიამულს, ბუნების
ფერხულს,
სულმა ტყვედ-ქმნილმა ვით შეამკოს, როგორ
უმღეროს?!...

* * *

ჩამიკლეს რწმენა
მგოსანს-ობოლ-მწირს.
სიამე, ლხენა,
ზე აღმაფრენა,
ბნელს ჩაესვენა...
დაეშვა ძირს... ძირს!

* * *

ნუ მომაგონებ დაღ-დასმულ ცელქ-ღიმს,
ნუ მომაგონებ იესოს მცნებას,
ვერ აატოკებ ჩამკვდარ გულის სიმს,
ვერ მომწყვეტ სევდას, ვერ მომცემ შვებას...

* * *

ვით მოგილოცო, ჩემო დაია,
ვით გაგაგონო უცხო, ამო ხმა;
სად მოგიკრიფო ვარდი და ია? —
იმედის ბუჩქი ჩასტკნა, ჩამოხმა.

ი. გრიშაშვილი.



ზეინაბის გასამართლება

მ აზრდეს, ქართულ თეატრში, წერა-კითხვის გა-
მავრცელებელ სწავლებლების სსსრკებდოდ გაიმართა ა.
სუმბათაშვილის დრამის „ლალატი“-ს გმირების, ზეინა-
ბისა და თარბეგის გასამართლება.

ამ გასამართლებას დიდძალი ხალხი დაესწრო, რომელიც
დიდის ეურადღებით ისმენდა, როგორც ბრალმძებლების,
აკრეთვე ღამცველების სიტყვებს.

ნათუიკმა მოსამართლეებმა დამსწავედ იცნეს ორივე
გმირი, რამაც დიდი მითქმა-მოთქმა გამოიწვია სწავ-
ლებებში.

ჯერ-ჯერობით ვებტკადეთ ერთ-ერთ დამცველის,
ბ-ნ გ. რაბაქიძის სიტყვას.

ზეინაბ

(სიტყვა წარმოთქმული 9 მარტს 1910 წ.)

ადამიანის ტრაგედიას სხვათა შორის
ისიც წარმოადგენს, რომ მსოფლიო არსთა შორის
არ არსებობს ერთნაირი გაცემა. ისინი მრავალ
საფეხურათ იყოფებიან და თვითთელი მათგანი
მხოლოდ შემდგომ ნაწილად შედის ერთს დიადს
სხეულში. კიბე კი, გრძელი და რთული, სულ მალ-
დება და მალდება, და იქ, უსაზღვრო სივრცეში,
უერთდება მსოფლიოსა. ქვემდგომი. საფეხური ვერ
სწვდება ზემდგომ საფეხურს, თუმცა ზემოდმი საფე-
ხური ეყრდნობა ქვემდგომსა. და იმართება ერთგვა-
რი გაუგებრობა: დაბალ საფეხურზე მდგომი ვერ
იგებს მაღალ საფეხურზე მყოფს, თუმცა მაღალ
საფეხურიანი სწვდება დაბალ-საფეხურიანსა: ადამი-
ანი უფრო იგებს ცხოველსა, ვიდრე პირუტყვი მეტ-
ყველსა. ეს მოვლენა ჰქმნის ტრაგიულს გაუგებრო-
ბას. კაცობრიობას მოველინა განმანთავისუფლებ-
ლი მესსია, კაცობრიობამ ვერ გაიგო და ჯვარს
აცვა იგი; მაგრამ მესსიამ გაიგო კაცობრიობა, გა-
გო მისი გაუგებრობაც, და ჯვარსცმულმა მისი
მიტევება სთხოვა უფალსა. ეს არის მსოფლიო სიმ-
ბოლო, რომელიც ობოლ ვარსკვლავად ევლინება
კაცობრიობის წყვედიადით მოცულს ისტორიასა...

და ეს გაუგებრობაა სწორეთ ზეინაბის გასამარ-
თლება. ზეინაბ ლალატობს ქმრად მიჩნეულსა და
საქართველოს დამპყრობელს სოლოვიმან-ხანს, ლალა-
ტობს ოცი წლის განმავლობაში თავის დამცირებით,
ცბიერობით, ტყუილით, სიცრუვით, სხეულის შეუ-
რაცხყოფით, ლალატობს მისთვის, რომ იხსნას თავი-
სი დამონებული ერი. მან ამ ლალატით თავისი კერ-
ძო პიროვნება მსხვერპლად მიიტანა სამშობლოს
საკურთხეველზე, იგი ამ მსხვერპლით უკვე გამართ-
ლებულია; მაგრამ მრავალნი, ყოველდღიური თვალსა-
ზრისით აღჭურვილნი, ვერა ხედვენ ზეინაბის ზე-
ადამიანურს მსხვერპლს და საშინელ დანაშაულად
უთვლიან მას ამა ლალატსა. და სწორედ ეს მაძიუ-

ლებს აეხადო საიდუმლოების ფარდა ზეინაბის ტანჯვით აღვსილს დიადს სულსა..

დედოფალი ზეინაბ თვითონ ტანჯვავა, მისი ხორციელი ყოფა. ძვირად მოიპოვება მსოფლიო ისტორიაში ისეთი მაღალი ტრაგიული გმირი, როგორც არის ზეინაბ. მშვენიერია სოფოკლის ანტიგონა: მან გადალახა ადამიანის მიერ შექმნილი კანონი და აღასრულა ღვთაებრივი მოვალეობა: უარყო ყველაფერი, რომ საფლავისთვის მიებარებია ველად მიგდებული ცხედარი მოღალატე მაგრამ საყვარელი ძმისა; მან არად ჩაავდო პირადი სიტკბოება გემონთან სიყვარულისა და სასჯელად ამისა საშინელს გამოქვაბულში დალია თავისი მშვენიერი სული. მშვენიერია იბსენის ნორაც: მან უარყო დამონებელი ოჯახი და იხსნა თავისი ქალური პიროვნება; მან უკუ აგდო უზრუნველყოფილი ცხოვრება და გაუდგა ეკლით მოკულს ახალს გზას.. მშვენიერია მრავალი სხვა გმირიც, მაგრამ ყველას უფრო დიადი თავის ტანჯვით დედოფალი ზეინაბია. ყოველი სხვა გმირის ტანჯვა უფრო ინდივიდუალურია, ვიდრე მსოფლიური; ზეინაბის ტანჯვა კი ტანჯვა მთელის ერის, მთელის სამშობლოს, საუკუნოებით ტანჯულისა და წამებულის.

რომ უფრო ნათელ-ყვით მისი საშინელი ტანჯვა, შევადაროთ მას ღრმა და ნარნარი ტრაგიზმი შექსპირის ჰამლეტისა. ვინ არის ჰამლეტ? დანიის პრინცი, რომელსაც ისეთი საქმის ასრულებას ავალებენ, რომელიც ერთსა და იმავე დროს მეტად დიადიცაა და მეტად მდაბალიც: ეს არის სისხლის აღება მამა მისის მკვლელისა, ჰამლეტის ბიძისა. ჰამლეტ ოცნების მოტრფიალეთა, და მას სამოქმედოთ უხმობენ; იგი პოეტია ბუნებით, და მას საბრძოლველათ იწვევენ. მან სრულებით არ იცის, რა ჰქნას და მისი შემოილობა სწორედ მასში მდგომარებს, რომ იგი იგონებს შემოილობას. ბრუტი იხვევდა გარს შემოილობას, რომ მასში დაეფარა ხმალი თავის გაზრახვისა, ხანჯალი თავის ნებისა; ჰამლეტის შემოილობა კი მხოლოდ მასკაა, რომლის ქვეშ მხოლოდ ნების სისუსტე იმალება. ხუმრობასა და გრიმასებში იგი გადაწყვეტის გადადებას ხედავს, — და განაგრძობს თამაშს მოქმედებასთან, როგორც მხატვარი თეორიასთან. იგი ხდება ჯაშუში საკუთარის ქცევისა, და აკვირდება რა თავის სიტყვებს, იმცნევს, რომ ეს მხოლოდ „სიტყვებია, სიტყვები, სიტყვები“... იმის მაგიერ, რომ სინჯოს გმირად გახდეს თავის საკუთარი ისტორიისა, იგი სცდილობს იყვეს მაყურებელი თავის საკუთარი ტრაგედიისა. აი ტრაგიზმი ჰამლეტისა, უაილდის მართალი დახასიათებით! ტრაგიზმი ოგი მეტად ღრმა და ძალზე ნარნარი, მაგრამ იგი ინდივიდუალურის სულის საზღვრებს მაინც ვერ სცილდება. ზეინაბის ტანჯვა სხვაგვარია: იგი სცდილდება პიროვნულს საზღვრებს და იტევს ეროვნულ ვაებას!

ვინ არის ზეინაბ? სოლეიმან-ხანმა ცეცხლითა და მახვილით დაიპყრო პატარა საქართველო, მისი ლა მეფე თეიმურაზ და მის ტასტზე თვითონ ავიდა მფლობელად. მეფის ცოლი ზეინაბი კი „მოღალატე თავადი შვილებმა მორთეს დედოფლად, მისცეს ხელში ოქროს სინი და ზედ დასდევს გასაღები უკვე აღებული ციხისა; ჩაჰკიდეს ხელი, გაიყვანეს გარეთ და იქ დააჩოქეს მტკერში“. ხალში ამ დროს სხვა რამე ხდებოდა... როცა გამხეცებულნი სპარსნი ზედ ასკდებოდნენ ქართველთ სიმაგრეს, ანანია გლახა ამ დროს მტკერის პირას ფრიალკლდეზე მიფორთხავდა: ხელში ბავში ეჭირა და გაჭირვებით აღწევდა დედოფალის სარკმელს... სოლეიმან დაეძებდა მოსაკლავად ტახტის მემკვიდრეს, — და აი, ანანია, ეს ღვიძლი შვილი ხალხისა, საკუთარს შვილს აძლევს ზეინაბს სოლეიმანის ცხენის ფეხთ ქვეშ გასაჰყლეთად, ხოლო მემკვიდრე ტახტისა გიორგი, ეხლა ერეკლედ გადარქმეული მას აღსაზრდელად ანანურში მიყავს. აი საშინელი მამული შვილური მსხვერპლი! აქ მარხია საიდუმლოება ზეინაბის ოცი წლის ტანჯვისა. ამბობენ, სასწაული არ ხდება, მაგრამ სულმა ბევრი რამ იცის სასწაულის მგზავსი. ხალხმა ანანიას ბავშვის სახით მსხვერპლი მიუტანა დედოფალსა, და დედოფლის სულს, ღრმასა და ძლიერს, ნათელსა და ნორჩს, რალაც ახალი რამ, მთელი ბუნების გარდამქმნელი, უნდა ეგრძნო. და იგრძნო კიდევ: „როგორც სვეტი ნათლისა, ისე მინათებდა ეს ამბავი ჩემს სიცოცხლეში, — ამბობს დედოფალი; მან მასწავლა, როგორ უნდა იცხოვროს ქვეყნად კაცმა ადამიანურად“. მსხვერპლი და მსხვერპლის შეწირვა, — აი, რა ისწავლა დედოფალმა ადამიანის სიცოცხლის გარდასაქმნელად. მას ერმა მსხვერპლი მიართვა, და ეხლა დედოფალი თვითონ სწირავს თავის თავს და სრულიად გარდაიქმნის. ხოლო თავის გაწირვა მას ამ საზიზღარსა და საშინელს სინამდვილეში ღალატით უხდება.

რაშია მისი ღალატი? სოლეიმანის ნდობის მოსაპოვებლად თვითონაც იმისთანა გახდა. იგიც ჩავგრასა და სისხლის ღვრას თხოულობდა. მისი ახალი სახელი უფრო საშინელი შეიქმნა მის სამშობლოში, ვიდრე სახელი მისი ჯალათისა. ულამაზო არ იყო და მისი სილამაზე მტარვალმა თავის გულისთქმათა სათარემოდ გაიხადა. სახელი, პატივი, სიყვარული, მეფური დიდება, — ყოველივე ტალახში ამოსვარა არაბისტანის გადმოვარდნილის საამებლად. მიეჩვია, ისწავლა ტყუილის თქმა, და სტყუოდა პირი-სახით, ხმით, გულისთქმით, მთელი არსებით... გადიოდა დრო და იღუპებოდნენ ნათესავნი, მეგობარნი, ერთგული ყმანი და მსახურნი. გაიქვავა გული. ამოიგლიჯა გულიდგან გრძნობა ვისიმე შებრალებისა. შებრალებაც, სიყვარულიც და სინიდისს ქენჯნაც, — ყოველივე დაითრუგნა,


ჩაკვდა მის გულში. აღარავინ უყვარდა უკვე: აღარც ნათესავი, აღარც მეგობარი... აღარც ღვიძლი შვილი... ისიც კი ამოირეცხა გულიდგან. აი საშინელი უარისყოფა.

იგი უარისყოფა ზოგიერთს შეუძლებლად ეჩვენება, მაგრამ თუ ზეინაბის ტანჯვით განდიდებულ სულს ჩაუკვირდით, დავინახავთ, რომ მას არა თუ შეეძლო უარისყოფა, არამედ კიდევ უარ უნდა ეყო ყველაფერი. ვისაც ჩემი გამოყოფა სურს, მან უნდა დაუტევოს ყველაფერი, — წარმოსთქვა დიდებულმა ნაზარეველმა; ვისაც უნდა რაიმე იდეა განახორციელოს, მან ამ იდეასათვის ყველაფერი უნდა უარჰყოს. და ზეინაბისათვის ამგვარ იდეად მისი ტანჯული სამშობლო წამოიჭრა წინ: და უარჰყო მან ყველაფერი, რომ მხოლოდ ერს კუთვნიდა. ამოირეცხა გულიდგან ყოველის სიყვარული, გახდა შეუბრალებელი. რისთვის? მისთვის, რომ მას უყვარდა მხოლოდ ერი, მისი ტანჯული და წამებული, ღარიბი და ღატაკი ერი. **ახლობელისათვის გული გაიქვავა, რომ შორეული უფრო ყვარებოდა.** აქ მან ნიცშეს იდეა შორეულის სიყვარულისა განახორციელა. ახლობელი მისთვის მონურია, ვით ოთარბეგი, — და სასტიკადაც ებყრობა იგი მას: აღვიძებს მას მკვეთრი თვალ-გაყრით თავისუფლებისათვის; შორეული მისთვის თავისუფალია, ვით უძლეველი სული თითქმის აჩრდილად ქცეულის ისახარისა, — და ღმობიერი სიყვარულით შესცქერის მას. და აი, ამ იდეას, იდეას სამშობლოს ხსენისა და განთავისუფლებისას, შესწირა მან მსხვერპლად სახელი, პატიოსნება დედოფლისა და დედაკაცისა, ალაღმართლობა გულისა, ხსნა მისი უკვდავი სულისა.

აი, საშინელი, სისხლით დაწერილი ფურცელი შემზარავი ტრაგედიისა: მას განმარტება არ სჭირდება: იგი თვითონ ცოცხლად გვისახავს ოცი წლის ტანჯვა-წამებასა. შეიძლება იკითხოს ვინმემ ოთარბეგით: ნუ თუ არ შეეძლო დედოფლის შური ეძია და გაეგმირა გული მტარვალისა? დიახ, რომ შეეძლო, მაგრამ, თვითონ დედოფლის სიტყვის არ იყოს, ვის რას მოუტანდა მისი სიკვდილი! განა, ცოტა ჰყავდა შაჰის სოლეიმანისთანა ქმნილებანი, კიდევ უფრო მოსისხარნი, კიდევ უფრო გაუმადლარნი სისხლის მსმელნი? არა, შურისძიების მოლოდინში არ იყო იგი მხოლოდ. იგი ელოდა იმ დღეს, როცა რისხვა ერისა ზღვასავით დაგუბდებოდა, როცა იგი რისხვა მოსქდებოდა მთის ადიდებულ წყალივით, როცა თვითეული მონა იგრძნობდა, რომ იგიც ადამიანია და თავისუფალი უნდა იყოს; იგრძნობდა და აღსდგებოდა მტარვალთა დასამხობად! და მისი შვილი წინ წაუძღვებოდა სილალის მოწყურებულ მეომართა! მაშინ მისი შვილის ფეხთა ქვეშ, მის განსჯად მიიტანდა იგი თვის ცოდოსა და თვის შერცხვენასა...

ასეთია ტანჯვა ზეინაბისა, ასეთია მისი მსხვერპლი: საშინელი და განმწმედელი... და ჩვენს წინაშე პირველ ყოველისა ასეთი კითხვა იბადება: შეუძლია თუ არა ადამიანს თავისი პიროვნება მსხვერპლად შესწიროს სამშობლოს განთავისუფლებას? არის თუ არა სამშობლო ისეთი უზენაესი ღირებულება, რომლის სახსნელად თუ საჭიროა პიროვნებაც უნდა დაჰკარგოს გმირმა ადამიანმა? დიახ, დიადია სამშობლო და ღრმაა მისი გრძობა; წმინდაა მისი საკურთხეველი და განმწმედელი მასზე შეწირული მსხვერპლი.

ყოველი ჩვენთაგანი მხოლოდ ორგანიული ნაწილია სამშობლოს სხეულისა, რომლის გარეშე ჩვენ სიცოცხლე არ შეგვიძლია. ჩვენ ვიტანჯვით, — იგი ტანჯვა მშობლიურ სიტყვაში უნდა გამოვხსნათ, რომ გამოთქმაში ვაქარვით მისი სიმძაფრე. ჩვენ წყლული გვაქვს, — მას მშობელის საყვარელი ხელი უნდა მიეკაროს, თორემ მისგან სისხლი ითქრიალებს. ჩვენ სისხლი მოგვხეთქს წყლულისაგან, — იგი სისხლი მშობელის ცრემლმა უნდა ასველოს, რომ მისი დენა უტკივრად ხდებოდეს. მშობლის ძუძუ უფრო ტკბილია, ვიდრე ნექტარი უკვდავებისა; დედის ნანა უფრო გულჩამწდომია, ვიდრე სიმფონია ბეტჰოვენისა. და განა მარტო ეს, სულიერი, გვიყვარს სამშობლოში?! ჩვენ გვიყვარს თვითონ მისი სხეულიც, მშობელი მიწა. ჩვენ გვიტაცებს თავისუფლად გაშლილი ველი, რომლის სივრცეს ღრმა ფიქრებს გადაყოლებთ ხოლმე. ჩვენ შეგფრთინავთ ამაყად ამართულს კლდეს, რომლის ნაპრალიდგან გაისმის არწივის ყვილი. ჩვენ გვიყვარს ყრუ ლელენი და მყუდრო ქალები, რომელთა ღუმილს მხოლოდ-ღა მწყემსის სალამური არღვევს. ჩვენ ვუსმენთ მთით გადმოხეთქილს ბინულს და მის ვერცხლისფერ ჩქერში ვნატრობთ გრძნობათა განზანას... ჩვენ ვეტრფით მოლოდინით მოკულს კორდს დასასვენებლად, და მწვანე მდელი გვიშლის ვარდსა და ყვავილს, მომხიბლავს და მათრობელსა... ასეთია სამშობლოს სიყვარული: ძლიერი, სტიქიური. ძნელი არის მის გარე-ყოფნა: გული ნაღვლით ივსება და სული კაეშნითა. რა აღტაცებას იგრძნობს გარდახვეწილი, თუ მას შორით უეცრივ მშობელი მუსიკა მოესმა: იგი უთუოდ ცრემლსაც დაღვრის აღტაცებითა. ძნელი არის სამშობლოს დაკარგვა, მთელი ერის დაობლება. ვერავინ აღწერს იმ ნაღვლითა და ბოღმით საგსე ღიღინს ებრაელისას, რომელიც მზის ჩასვლისას და ბუნების მიყუეების ჟამს გაისმის განმარტოებით: იგი ნაღვლობს აღთქმული ქვეყნისათვის, იმა ღიღინში საუკუნობია ჩამარხული, და რა ვერ ნახულებს, ჰქრება ნელი-ნელ უდაბნოში დღისით ანთებული აღივითა. ვერა რა სიმი ჩაიქსოვს სამშობლოს ტანჯვის ნარნარ გრძნობას; ვერა რომელი მელოდია გამოსთქვამს მისი სულის ობლობას. შეიძლება თარმა გვამცნოს იგი, მაგრამ ეს ხომ მუსიკა არაა: ეს



ყელს მომდგარი ქვეთინია, დაკარგული ჰანგი, რომელიც დედას დაეძებს და ვერ მოუნახავს..

აი, რა არის სამშობლო და რას შესწირა ზეინაბმა მთელი თავისი არსება. იგი არ არის უბრალო პიროვნება, სული მისი აღარ არის ინდივიდუალური: იგი ქცეულა სამშობლოს პიროვნებად, მასში სახიერებულა საქართველოს სული. ზეინაბ აღარ არის ზეინაბ: იგი მხოლოდ სიმბოლოა ობოლი სულის; მაგრამ სიმბოლო უფრო ნამდვილი და ხორცსმული, ვიდრე პიროვნება კერძო ადამიანისა. მაგრამ, განა შესაძლებელია ნამდვილი არსის სიმბოლოდ ყოფად-ქცევა? იკითხავს ვინმე და სრულიად სამართლიანად. შესაძლებელია, მაგრამ საძნელო.. სამშობლო სული ერთია და შეიძლება რომელიმე მისი მხარე ერთს პიროვნებაშიაც განხორციელდეს. ეს ხორციელება იქნება სიმბოლო განხორციელებულისა: ზღაპარი გამოსთქვამს ხალხის ნაზრახს, მითი სახავს ხალხის ფიქრს, ლეგენდა ასხამს ხალხის ნაზრს. და სწორეთ ამნაირად შეიძლება რომელიმე მომადლებულმა შეიღმა მშობელი ერის სახის რომელიმე მხარე განახორციელოს. შოთა რუსთაველმა გამოსახა ქართველობის შემოქმედებითი ძალა და ჩამოასხა მისი ნიჭი საოცარის მეტყველებისა. ზეინაბიც ასეთი პიროვნებაა: მინ გამოსახა ქართველის სული, მონობაში ტანჯული და ტანჯვაში მეგრძოლი. და ღირს-აღსანიშნავი ფაქტიც: რამდენათ უფრო ახორცილებს რომელიმე შვილი ერის კოლექტიურ სახეს, იმდენად იგი საკუთარ სახეს სცილდება, ჰკარგავს მას, ან უკეთ რომ ვთქვათ, ისხამს ახალს სახეს, იღუმაღს, სიმბოლიურს. შოთა ჩვენთვის ყოველდღიური პიროვნება არაა: იგი იღუმალი სახეა ქართველთა პოტენციალური ძალისა. იგი ლანდია, აჩრდილი; მაგრამ ყოფის ღრმა კუნჭულში ნაგრძნობი, იგი ლანდი ხორცსმული არსია, იგი აჩრდილი მკვეთრი ინდივიდუალობა. ასეთია ზეინაბიც: იგი აღარაა ყოველდღიური კერძო პიროვნება: იგი, ასე ვსთქვათ, მითია და ლეგენდა, მხიბლავი ზღაპარი, წარმტაცი პოემა... და ეს პოემა და ლეგენდა უხილავი სახეა საქართველოს მონობაში ტანჯული სულისა. ქვეყანაზე არც კი არსებობს ისეთი ტანჯული ერი, როგორიც არის ქართველი ერი. ისტორია მისი ერთი დიდი ტრაგედიაა, საშინელი და შემზარავი მეგრტიროლოგია. სიცოცხლე და სიკვდილი, სიკვდილი და მკვდრეთით აღდგომა, თავისუფლება და დამონება, მორჩილება და განთავისუფლება, — აი სისხლით გასმული ხაზი იმა ტრაგედიისა.. ამას ქვეთინებს ქართლის დედა, ამას მოსთქვამს ქართველი მგოსანი, ეს გაისმის მეგრის სევდიან ლიღინში.. და ყველა ეს ერთი ჰანგით არის ამუსიკებული, გულჩამწდომი ჰანგით, რომელიც თითქო წყვილია ბნელოთში დაკარგულა და აქვეთინებული დაეძებს მშობელს მუსიკას. და, აჰა, იმა ჰანგმა მონახა იგი დედა, ზეინაბ, მწუხარე და საშინელი სახე დამონებული ერისა...

ზეინაბ ემორჩილება სოლეიმანს არა მისთვის, რომ დაემონოს, არამედ მისთვის, რომ სამშობლო დაიხსნას. იგი თავს ამცირებს, სული რომ განადიდლოს.. იგი ფებს ეგებს მტარვალს, რომ ერი აღამაღლოს.. მან მისცა მას ყოველი: დიდება და პატივი, სხეული და ვნება, ხორცი და ტკბობა. მაგრამ არ მიუცია მას მტარვალისათვის თავისი სული, ტანჯული და წამებული სული, რომელიც სულ სხვას ლამობდა, სულ სხვას ოცნებობდა.. **ზეინაბმა უარჰყო თავისი სხეული-პიროვნება ხოლო სული-პიროვნება ერის სახსნელად აღზარდა..**

და აქ იმართება საშინელი ტრაგიული ბრძოლა: მსხვერპლი და მსხვერპლის შეწირვა.. განა, შეიძლება „სხეული-პიროვნების“ გაწირვა, თუ გინდ უმაღლესი იდეალისათვის? იკითხავს წარმართი და მისი მზგავსი თანამედროვე ესთეტი-ინდივიდუალისტი. ყველაფერი სხეულია, ყოველი ვნებით სცოცხლობს. არ არსებობს უკვდავება, მაგრამ არც სიკვდილი არსებობს. ერთის სიკვდილი მეორის სიცოცხლეა. მეორის სიცოცხლე სხვისი სიკვდილი; მაგრამ ყველა ერთად ერთ-სხეულნი არიან, მსოფლიო სიცოცხლეს ზიარებულნი.. და აი, ადამიანის სხეული მისთვის წმიდათა წმიდა უნდა იყოს.. ადამიანი სხეულით ასხამს თავის პიროვნებას, — და ის, ვინც ჰყიდის თავის სხეულს, იგი ჰყიდის პიროვნებას; ვინც ამცირებს სხეულ-ყოფას, იგი ამცირებს თავის არსებას. და მართლაც: ძნელია სხეულის შეურაცხყოფა, საშინელია მისი ძალდატანება, შემზარავია მისი გაყიდვა. ამას მოწმობს კაცობრიობის ვრძნობა, ამხედრებული ამგვარი ქცევის წინააღმდეგ.. ყველა ეს მართალია, — და სწორეთ აქ ღრმადდება ადამიანის ტრაგიზმი..

ქვეყნიერება ისეა მოწყობილი, რომ ყოველი მაღალი იდეა თავის განსახორციელებლად მსხვერპლსა თხოულობს. ჩვენ გვსურს გამოვსთქვათ მშვენიერი ჰანგი?! ხე უნდა მოვსჭრათ, ცხოველი უნდა მოვკლათ, ხისაგან ჭიანჭური გამოვთალოთ, წელი მას სიმაღლედ გავაკრად, — და მხოლოდ შემდგომ შეგვიძლია გავახმაუროთ იგი ჰანგი. ესევე ხდება ადამიანის ცხოვრებაში, რაიც შემზარავად ხდის მის ტანჯვას.. და სწორეთ ეს შემზარავი მხარენი ახლავენ ზეინაბის ტრაგედიასა. იტანჯვის ქრისტე, მაგრამ მის ტანჯვაში ვერ ნახულობთ ადამიანურს ნაკლს; იტანჯვის ზეინაბ, და თქვენ მის ტანჯვაში დანაშაულსაც ჰპოულობთ. აქ მარხია საშინელი სინამდვილე: ზეინაბს თავის მსხვერპლით რაიმე ძვირფასი უნდა დაეკარგა.. და დაჰკარგა კიდევ: თავისი სხეული, თავისი ემპირიული პიროვნება... მაგრამ, ვის შეუძლია სთქას, რომ მან ყველაფერი დაჰკარგა?! არავის! არ დაუკარგავს მას ერთი რამ, რაიც ყოველს დაკარგულზე მაღლა სდგას: ეს მისი სული, მონობაში ტანჯული და ბრძოლაში განთავისუფლებული. და აი, ამ მძლავრი სულით მან თავი-


ვისი ნამდვილი პიროვნება იმ სიმაღლემდე აღიყვანა, რომ იქცა შეუდარებელ ზე-ქალად...

ადამიანის ბუნება ორი „მეს“ სახიერებაა: ემპირიულის და ზემპირიულის, წარმავალის და წარუვალის, აზრდილისებურის და ნამდვილის ადამიანის „მე“ ყოველთვის ერთი და იგივე არ არის: იგი მუდმივ იცვლება: და ცვალებადში ახორციელებს იგი თავის მეტაფიზიურს სახეს. საკითხავია მხოლოდ: სად ხდება მისი ნამდვილი ხორციელება, სად ამყარებს თავს მისი ნამდვილი არსება? ძნელია ამის პასუხი, მაგრამ შეიძლება გადაჭრით ითქვას, რომ იგი დამყარება არ მოხდება მსოფლიოსაგან გამოყოფილს კერძო პირადობაში. ამაყია ბაირონი, კაენითა და მანფრედით თვით განგების ხმალში გამომწვეველი; წარმტაცია ფრ. ნიცშე, ზარატუსტრას პირგამხებებული სახით თვით ღვთაების წინამდევ ამხედრებული; მძლავრია დოსტოევსკის ივ. კარამაზოვი, არ-მიმღები და უარყოფელი არსებული ქვეყნისა; მატყვევებელია მათი ზე-კაცური განმარტოება, — მაგრამ საკმაოა მათ გარშემო მოსპოთ თუ გინდ ეროი წუთით მსოფლიო სიცოცხლის სუნთქვა, და ისინი, ვით ედგარ პოეს ტიტანი, კვარცხლბეკითგან ჩამოვარდებიან და ინაღვლებენ იმა სიცოცხლის სუნთქვისათვის.. დიახ, არ მოხდება დამყარება ადამიანის ნამდვილი პიროვნებისა მსოფლიოსაგან გამოყოფილს კერძო პირადობაში! ადამიანმა უნდა უარჰყოს თავი თავისი, რომ აცხონოს სული თვისიო, — წარმოსთქვა დიდებულმა ნაზარეველმა, და მის შემდგომ მრავალი გენიოსი იმეორებს ამ იღუმალს მაგრამ სამართლიანს აზრსა. რას ნიშნავს ეს? უარისყოფას მისას, რაც რომ ყოველდღიურია და წარმავალი, შემთხვევითი და დროული; უარისყოფას მისას, რაც რომ ვიწროთ გამოჭრილია და ხშულ ბნელეთით მოცული; უარისყოფას ვიწრო პირადი „მე“-სას, რომელიც სხვის უარყოფას ცდილობს შურით, ღვარძლით, მძულვარებით.. ადამიანი ამ მხრივ მუდმივ სწირავს მსხვერპლსა და უნდა სწირავდეს კიდევ. არის ერთი მოხიბლავი ლეგენდა, აღმოსავლეთის წიაღში შობილი. ღმერთმა შექმნა ქვეყანა, მაგრამ შექმნის დროს თვითონ გაჭკრა მის წიაღში: მან ისე შეიყვარა ქვეყანა, რომ მსხვერპლად იქცა მისთვის; ამიერთგან ყოველი არსი ქვეყნისა ცდილობს ეზიაროს ღვთაებრივობას და სიკვდილით, სიცოცხლის შეწირვით, ერთვის მსოფლიოსა. ადამიანი „იდეა“, უსხეულო სახე, ჯერ კიდევ განუხორციელებელი. და სწირავს იგი ყველაფერს, რომ იგი იდეა სრულად განასახიეროს: აქ ჩამოისხმის მისი ნამდვილი, მეტაფიზიური „მე“.. **იგი სხვას უნდა შეერთოს საყვარულით, რომ იხსნას საკუთარი პიროვნება.** და შეერთვის მხოლოდ მაშინ, თუ უარჰყო თავისი ვიწრო „მე“, კერძოებით დახშული. ასეთია სიყვარული, რომელიც მუდმივ მსხვერპლსა სწირავს: იგი

თვითონ უზენაესი მსხვერპლია. ადამიანი, სიყვარულით ანთებული, სწირავს ყველაფერს: დროულს, შემთხვევითს, წარმავალს, სწირავს თავის თავს, თავის წარმავალ „მეს“, რომ საყვარელ არსში მონახოს თავისი ნამდვილი მეორე „მე“ და მით განახორციელოს თავისი ნამდვილი წარუვალი არსება. ასეთია სიყვარული, მუდმივ მსხვერპლის მწირველთ.. ეს არის თავის თავის უარჰყოფა სულის ხსნისათვის. განა, იგივე თავის უარყოფა არაა ვერცე წოდებული თავდავიწყება?! ჩვენ ვუჭვრეტთ ბუნების მშვენიერებას, მთვართ განათებულს, და ვერთვით მის იღუმალს სულთქმასა; ჩვენ ვისმენთ გულჩამწდომ ჰანგს, და ვთვრებით მისი იღუმალი გულისთქმითა; ჩვენ ვერთვით ყოველს მშვენიერს, ჩვენ ვეზიარებით ყოველს უმაღლესს, და თავი გვავიწყდება, უარყოფთ თავის თავსა.. მაგრამ სხვასთან შერთვა ხომ არ არის სრულიად უარყოფა თავის თავისა!? ჩვენ უარყოფთ მხოლოდ ყოველდღიურს, წარმავალს, შემთხვევითს: რაც ვთვრებით, ვაქრობთ მხოლოდ ფიხელ „მესა“; მაგრამ ნამდვილ „მეს“, სადღაც კუნჭულებში მიმაღლულს, ჩვენ არა თუ არ უარყოფთ ამ თავდავიწყებაში, არამედ პირიქით ვნახულობთ მას, ვნახულობთ უხილავ ძაფს, ჩვენის მსოფლიოსთან მაერთებელს, ჩამქსოველს, გადამბმელს.. ასეთია მსხვერპლით თავის თავის უარისყოფა..

სწორედ ამ სახით ერთვის ზეინაბიც ქართველობის სხეულს. მან უარჰყო ის, რაც წარმავალია, რაც ყველას ეკუთვნის, რაც შესახებელია, რაზედაც შეიძლება ძალა იხმარო, — და ეს უარყოფილი არსება, მისი სხეული, მოტყუებითა და ცბიერობით მისცა სოლოღეიმანსა. ხოლო სული, წარუვალი და ნამდვილი, ფორმის მქმნელი და შეუხებელი, სული, ეს დაუმორჩილებელი ენტელეხია, ნამდვილი მეტაფიზიური არსება, მან **საქართველოს სხეულს ჩაუქსოვა და მით უკვდავყო თავისი პიროვნება.** აქ მან ნამდვილათ დაამყარა თავისი „მე“ ნამდვილ სინამდვილეში. აქ არის მისი უზენაესი მსხვერპლი.. მან უარჰყო სხეული, რომ სული ეხსნა; მან უარჰყო ნამდვილი „მე“, რომ წარუვალი პიროვნება მოენახა. მან მსხვერპლად შესწირა თავისი პიროვნება საქართველოს, შესწირა მის წმინდა საკურთველზე, და ღრმა ტრაგიზმით სავსე თვითონვე იყო მსხვერპლიცა და შემწირველიც. და მით მისი არსება სრულიად გარდაიქმნა, ადამიანს გასცილდა, იქცა ზე-ქალად..

ყოველი მსხვერპლი გარდაიქმნის, — ამას ფიქრობს ადამიანი და ახვევს მას მითსა და ლეგენდაში. და მოგვითხრობს ერთი საუცხოვო ლეგენდა. ტიალს მინდორში უფსკრულითგან ცეცხლი ამოდიოდა და მალლა-მალლა მრავალფერ ალად იშლებოდა. ბრძენნი ფიქრობდენ: ვინც ცეცხლის შუაგულში ჩავარდება, იგი გარდაიქმნის და ღმერთად იქცევაო. მაგრამ ვერავინ ბედავდა შივ ჩავარდნასა. იყო კეთ-



როგანი, საზიზღარი და შემზარავი. ერთმა ღმერთმა ურჩია მას იმა ალში გადავარდნა. და გაბედა მან შიგ ჩავარდნა, და გადავარდა იგი იმა ალში, და დაიშალა მისი სხეული. ამ დროს მოფრინდა მძლავრი არწივი, თავს დაეცა ცეცხლის კოცონს, წარიტაცა ალის ბურთი, კეთროვანით აღჭურვილი, ცას აიტანა იგი, და იქცა იგი ბურთი ცეცხლისა მზედ, ბრწყინვალე მზედ..

ღიახ, მსხვერპლი გარდაიქმნის, — და ზეინახ, ეს უზენაესი მსხვერპლი, ვით კეთროვანი ცეცხლში, სრულიად გარდაიქმნა.. მან სძლია ვიწრო-პირადი აღმიანობა და იქცა გაცისკროვნებულ ზე-ქალად; მან უარჰყო თავი თვისი და გარდაიქმნა ჩვენი სულის სახედ; იგი სდუმს, მაგრამ იგი უხმო გამოთქმა ტანჯული სულისა. იგი უკვდავია და მოქმედობს. ქართველთა ველზე მას საბა ბერი ჰყავს, რომელიც ნერგავს სამშობლოს სიყვარულსა; ანანურში მას ჰყავს მოხუცი ანანია, რომელიც ზე-ქალს შვილს უზრდის; შეიძლება იგი შვილი ვერ გამოდგეს ნამდვილი მამულიშვილი, მაგრამ იქვე დათოც არის, ანანიას შვილი, ხალხის შვილი, რომელიც გადმოიჭრება, ვით მოწყვეტილი ირემი, და მძლავრი ხელით, ხმალ-ათამაშებულთ, თავსზარს დასცემს მტარვალს სოლეიმანსა... ზეინახს თქვენი გამართლება არ სჭირდება: საუკუნოთა იდუმალს ცელაში იგი უკვე გამართლებულია.

გრიგოლ რობაქიძე.



შანტეკლერი.

ედმანდ როსტანის.

—:—

ყურადღების ღირსია ეს საოცარი დრამატული პოემა. მომქმედ პირებად აქ გამოყვანილია სხვადასხვა ფრინველები და უმთავრეს გმირად კი — მამალი **შანტეკლერი**. მამალი საფრანგეთში ნაციონალურ ფრინველად ითვლება; იგი გამომხატველია გაბედულობის, მხნეობის და კეთილშობილურ ხასიათისა. — როსტანის თხზულებამ დიდი შთაბეჭდილება მოახდინა პარიჟში და უკვე გადათარგმნილია მგონი ყოველ კულტურულ ენაზე. — ჩვენ დღეს ვბეჭდავთ ერთ ნაწყვეტს — იმ ადგილს, სადაც შანტეკლერის საყვარელი **ხოხობი** ეხვეწება მას: მითხარი, რაშია შენი ყივილის იდუმალი ძალაო? — ეს ადგილი ერთი უკეთესთაგანია პოემაში.

შანტეკლერი.

ღირსი ხარ ნდობის, ხოხობო? გული გაქვს სიფაქიზით ამოკალული?

ხოხობი.

სთქვი!

შანტეკლერი.

შემომხედე და თვითონ სცანი ის მოწოდება, რომლის ნიშანი აი ეს არის, ეს ჩემი ტანი. როგორც რემ ბუკი, მტკიცე მაქ ისა, და ისე, როგორც საყვირი რქისა, გადაზნექილი ყელი და გული; თითქო მისთვის ვარ დაბადებული, რომ ხმამ ჩემს გულში დაიტრიალოს, რომ მერე ძლევით დაიგრიალოს... დამაცა!... ზოგჯერ ამპარტავანი მიწას რომ ვქექავ — გამოიცანი — რას ვეძებ მაშინ?

ხოხობი.

მარცვალს, მგონია.

შანტეკლერი.

ჰმ, ეს აზრადაც მე არ მქონია. ზოგჯერ მარცვალსაც ვჰპოულობ ხოლმე, ეს მართალია, მაგრამ იმას მე ქათმებსა ვაჭმევ...

ხოხობი.

მაშ რაღა გინდა, მიწას რომ ქექავ?

შანტეკლერი.


ადგილი წმინდა, რომ იქ დავერქო, როგორც ისარი, ყივილის დროსა.

ხოხობი.

მართალი არი.

შანტეკლერი.

ისე არ ვყივი მე, შანტეკლერი, თუ არ გაფიხრიკე კენჭი და მტვერი და რვა თითები, წარმოიდგინე, მიწას შავს და რბილს ვერ დავაბჯინე. მაშინ, ამ მიწას თუ მივეკარი. ვყივი... და აი სწორედ აქ არი სეკრეტი ის, თუ საიდან არი ჩემი გალობა ამომდინარი. წმინდა წიაღი სამშობლო მხარის მე მაძლევს იმას... ამიტომ არის, რომ იგი ასე მითრთოლებს გულსა; უფრო კი მაშინ, თუ ცის უფსკრულსა დაეტყო ცისკრის ფერ-შემკრთალობა: ოჰ, მაშინ მე მრწამს გენიალობა! ფოთლების რხევა ნაზი და ნელი, მაშინ მე მივლის, ვით ქრუანტელი ციური ალის, და მეც ვძრწვი, რომა არ მომივიდეს რამე შეცდომა.



ქართველი
წიგნიერები

ბუკსა მე უფრო დავემგვანები,
ტანში რქასავით გავიღუნები:—
მიწა ხმას იღებს ჩემითა—და მე,
მამალი არ ვარ უბრალო რამე —
მე ვარ იმ ხმისა გამტარებელი,
რომ მით ავავსო კამარა ვრცელი!

ხოხობი.

შანტეკლერ!

შანტეკლერი.

ის ხმა, ცისკენ რომ აღის,
იგი — ნატვრაა შუქის დიადის,
ნატვრა მწველი და გიჟური რამე,
რომ დღე გათენდეს, გავიდეს ღამე,
და გაიშალოს ოქროს ნათელი.
იგი—ნატვრაა განუწყვეტელი
ძველი ნაძვისა, ბილიკის ძველის,
ფესვების შუა ხავსიან ზვრელის,
ყვავილის, კენჭის ფერად ფერადის—
ის ნატვრა მწველი, ცისკენ რომ აღის.
იგი — ხმა არის მწუხარე მათი,
რასაც აქვს ფერი, შნო და ლაზათი;
ხმა არის იგი, რომლით ტყე-ველი
ცას ევედრება, ნამითა სველი,
ნამისა ცვრებზე—ცისსარტყელასა;
ბალი კი ითხოვს შუქსა ყველასა,
რომ ფოთლებ-შორის, ხეივნის ბოლოს;
ცეცხლის ალები წამოათრთოლოს.
იგი ხმა არის არსის ყოველის,
რომელიც ღამეს, ვით სასჯელს, ელის
და ტანჯვით იტანს, სანამ არ გავა,
თუმც კი არ იცის, რა დააშავა;
ხმა — სიცივის, შიშისა, წყენის,
რაცა კი ღამეს ჰრევსა და ჰდენის,
მწუხარებისა, ტანჯვისა ცხადის, —
ის ხმა დიადი, ჩემში რომ გადის.
იგი ხმა არის მორთოლვარე ვარდის,
სათიბი ველის, ჩირგვის და ბარდის;
ცელის ველზედა დავიწყებულის
მუშისა-მიერ... სითეთრის სრულის,
რომელსაც უფრო უნდა ბრჭყვიალი;
ცხოველთა, რომელთ არა აქვსთ ბრალი,
არცა მოქცევა ზამ დასამალი;
იგი—ნატვრაა ნაკადულისა,
რომ ცას აჩვენოს სიღრმე გულისა;
თვითონ გუბესაც ის ენატრება,
როცა შუქის-ქვეშ ბრწინავს და ჰშრება,
თითქმის ტალახსაც იგივე სწადის, —
აი ის ხმები, ჩემში რომ გადის.
ხმა არის იგი მშვენიერ ყანის,
გაშლილ ჯეჯილის, ზურმუხტის მწვანის;
ხისა, რომელიც ლამაზად ჰყვავის;
ყურძნის, ფოთლებში რომ გამოსკვივის
და ჰნატრობს, რომ მზემ აუწვას კანი;

ხიდის, რომელსაც აღამიანი
უნდა და უყვარს, მასზე გამვლელი,
რომ შეარხოს ფიცარი ძველი,
და, მასზე ჩრდილი დაშლილი თუა,
ჩიტების ლანდიც ჩრდილების შუა;
ყველაფრის—რასაც უღულს და ჰშვენის
წყურვილი მღერის, სიცოცხლის, ღხენის,
ან სამსახურის: — გახდეს ან კარი,
კიდე, ან სკამი, ან ქვა გამთბარი,
რომლით—იქნება—გათბება ნელა
ან კაცის ხელი ან ჭიანჭველა...
ბოლოს ის არის, იქ იხატება
ჯანმრთელობა და მშვენიერება
ყველასთვის, ვისაც კი უნდა, რომა
სდულდეს სიცოცხლე მზის ქვეშ და შრომა.
რა რომ დაიძვრის ჩემში ეს ხმები,
მე ვჭიმავე სულსა, თვით ვიჭიმები,
რომ ჩემს ყივილსა უფრო ხმოვანი
მიეცეს ამით სიღრმე და განი.
ჯერ მე იმასა შევიკრავ გულში,
შიშით დამწვარსა მის სიყვარულში,
მერე ძღვეით რომ გამოიხატოს,
გავხსნი უეცრად ჩემსა ყანყრატოს
და დავიყივლებ... და მაშინ მჯერა,
რომ დიადი მაქვს ბედისა წერა
და ვით ერიქონს თავზარდამცემი
დაანგრევს ღამეს ყიყლიყო ჩემი...

ხოხობი (შეშინებული)

შანტეკლერ!

შანტეკლერი.

მე ხმა ისე მაქვს რთული,
მხნე, მედიდური, დარწმუნებული,
რომ ცა ვარდისფრად ათრთოლებული
მემორჩილება!

ხოხობი.

შანტეკლერ!

შანტეკლერი.

ვყივი!

და თუ არა სჩანს დილისა სხივი,
ვყივი ხელახლად!

ხოხობი.

შანტეკლერ!

შანტეკლერი.

მერე,


რომ დამეფრქვევა სივარდისფერე
გათენებისა — მე ვარ შემკრთალი...
რომ მე—მე რა ვარ? რაღაც მამალი...
მზე კი ამომყავს სიბნელიდანა!

ხოხობი.

მაშ საიდუმლო ეგ არის განა?

შანტეკლერი.

მუდამ შიში მაქვს, რომ უჩემოდა
ძილს სამუდამოდ მიეცემოდა



აღმოსავლეთი!.. რაც გინდ რომ იყოს,
 მე არ ვიძახი მისთვის ყიყლიყოს,
 რომ მოველოდე რაიმე ქებას,—
 მე ნათელს ვეძებ, არა—დიდებას!
 ყივილი ჩემთვის—ხმალია, რჯული,
 რითაც მე ვიბრძვი და მიცემს გული.
 შანტეკლერი ვარ, მე ნათლად ვყივი,
 რომ ნათელი ვშვა, შუქი და სხივი.

ხოხობი.

გაგიყდი?! ნუ თუ ეს ძალა არის...

შანტეკლერი.

გამშლელი ვარდის, თვალის, ფანჯარის,
 სულისა... დიად, მე მაქვს ეს ძალა!
 და თუ ბურუსი გადაიშალა,
 სჩანს რომ იმ დილას ჩემი ყიყლიყო
 აღბად ყოველ შნოს მოკლებულ იყო.

ხოხობი.

დღისით რომ ჰყივი?

შანტეკლერი.

საფარჯიშებლად...

ან ფიცსა ვაძლევ დასამშვიდებლად
 გუთანს, ნამგალსა, ნაძვსა და თხმელას,
 რომ გავადვიებ ცისკარზე ყველას.

ხოხობი.

შენ ვინ გაღვიძებ?

შანტეკლერი.

მე—მხოლოდ შიში,

არ მომივიდეს რამ იაღლიში.

ხოხობი.

მაშ მართლა გჯერა, რომ ეს ქვეყანა
 სავსეა შენი ყივილით განა?

შანტეკლერი.

კარგად არ მესმის—რაა ქვეყანა?!

მე ვყივი მხოლოდ და ჩემისთანა
 მინდა, რომ ყველგან იყოს მამალი,
 რომ შეასრულოს მან წმინდა ვალი
 წინაშე თვისი სამშობლო მხარის...
 შანტეკლერობაც სწორედ ეგ არის!

გ. გვაზავა.



აღსდგა!

—:—

I

განთიადია: ცისა კაბადონს
 შავ-ბნელი მწუხრი გადასწოლია;
 და ღრუბელთ-კრებულს არე, მიდამო,
 წყვდიადის ქვეშე ჩაუქოლია...

სღუმს თვით სამყარო, სღუმს ოკიანე,
 გრგვინვა ტალღისა მიუჩეხებულა;
 და მათა შორის ქარი მგმინავი
 სადღაც ღელეში დაფიქრებულა.

—:—

II

უცბად იელვა: და შავსა ღრუბლებს
 მკერდი განუბო ცეცხლის ისარმა,
 მეხი გავარდა, შთაინთქა უფსკრულს
 და მას ხმა მოსცა გრგვინვით მთა-ბარმა.

—:—

ნელ-ნელ აღმოხდა მთვარე პირ-ბადრი:
 საღამი უძღვნა მკრთოლვარე ვარსკვლავს,
 ძირს ჩამოეშვა სვეტი სინათლის
 და ზედ დაეყრდო მოძღვრისა საფლავს!...

—:—

ანგელოზთ გუნდმა იწყო ღაღადი,
 ცაში ჩამოჰკრეს ცისკრისა ზარი,
 და ხმა გაისმა კიდით კიდემდე
 „აღსდგაო მკედრეთით ქრისტე მოძღვარი“.

—:—

აღმოსავლეთმა ცეცხლის ფრად გაჰკრა,
 მზემ სხივი სტყორცნა მთა-ბარს ტრფიალით;
 იუდა შეჰკრთა და საღნი კლდენი
 გადაიარა ძრწოლვა-კანკალით!...

—:—

ამოეფარა ჯოჯოხეთის ფსკერს
 სატანათ გუნდი თავ-ზარ-დასხმული;
 აწ აღარ დაჰქრის შავ-ბნელის სახით
 სულის მქენჯნავი ბოროტი სული...

—:—

ბულბულმა იწყო სტვენა წალკოტში,
 სოფელს მოჰჟინა გრძნობის ხმა მტკბარი
 და შეუერთა სოფლისა ძახილს,
 „აღსდგა მოძღვარი, აღსდგა მოძღვარი“!...

ს. ფაშალიშვილი.



ნუსკალ ხანი

ისტორიული მოთხრობა.

(გუძღენი ძმებს კოტეს და მიტროს).

(გაგრძელება*)

IV

—:—

ქვათენთის ციხის მიწასთან გასწორების შემდეგ
 ნუსკალ-ხანი უმაღლვე აიყარა და შეუდგა ჩაყ-
 მის ხევის რბევას, ხალხი შეხიზნული იყო ციხე-სი-

*) იხ. „მ რ ი“ № 10.

მაგრებში. ისე რომ სოფლებში არც ერთი ადამიანი არ მოიპოვებოდა. ციხეების აღებას ერიდებოდა ნუცალი, რადგანაც ბევრ მსხვერპლს თხოულობდა.

სოფელ **ჯვარბოსლის** მიწასთან გასწორების შემდეგ, ნუცალ-ხანმა გაგზავნა მურთაზი სამი ათასი ჯარის კაცით სოფელ წაროს გასანადგურებლად და თვითონ-კი ნაყაივეჩოზე გადავიდა პირიქით თუშეთში, რომ აეღო სოფელი ფაჩხმა, გირევი და დაბანაკებულიყო გირევის ვაკეზე.

სოფელი წარო განთქმული იყო იმ დროს, როგორც თავის მცხოვრებლების სიმრავლით, ისე მტრისათვის მიუდგომლობითაც. ძლიერ დაკიდებულ მთის კალთაზე აშენებული, ვიწრო ორღობეებიანი, სათოფურებით, პიტლო სიბის ქვით აგებული სახლებით მრისხანედ გადაჰყურებდა წარო არემარეს. ორ მხრივ ჩაუდიოდა ღრმა ხეხევი, სადაც გაშმაგებულად ღრიალებდნენ მდინარეები. მტერს უფრო ადვილად შეეძლო მისვლა სოფელში აღმოსავლეთის მხრიდან და სწორედ ამ საშუალება იდგა სამ-სართულიანი ხუცის ციხე, რომელიც გადაჰყურებდა ძირს თუშეთის ალაზანს. ხუცის ციხე განთქმული იყო მთელ თუშეთში თავის სიმაგრით. გაჭირების დროს ამ ციხეში იფარავდნენ თავს წაროელები და აქედან უმასპინძლებოდნენ მტერს.

მურთაზიც ამ აღმოსავლეთის მხრივ მიადგა წაროს. ხალხი ჩაიკეტა ციხე-სიმაგრეებში და საომრად მოემზადა. მურთაზმა ერთი ნაწილი ჯარისა დააყენა ხუცის ციხის პირდაპირ და მეორე-კი შეუტრია სოფელს. ვიწრო და მიხლართ-მოხლართულ წაროს ორღობეებში დატრიალდა ცეცხლის ალი. სეტყვასავით გამოდიოდა სათოფურებიდან ტყვია და უწყალოდ იელიტებოდნენ ლეკები. მაგრამ დაღესტნის შვილები არ შედრკნენ და წინ-და-წინ მიიწეოდნენ, რაც დასაწველი იყო, ცეცხლს აძლევდნენ. ცეცხლის გუგუნე, ტაკა-ტაკი, თოფის გრიალი და ხალხის გაშმაგებული ყიჟინა — ყველა ეს საზარელ სანახაობას, ჯოჯოხეთს წარმოადგენდა... ცეცხლის და თოფის წამლის ბოლისაგან დაბნეულა იქაურობა. ამ სიბნელეში ებრძოდა სიცოცხლე სიკვდილს, იღვრებოდა სისხლი და იკენჭებოდა სოფელი მკვდრებით. ცეცხლისაგან და მის ბოლისაგან შეწუხებული წაროელები გამოდიოდნენ გადამწვარ სახლებიდან და გაშმაგებულ ბრძოლაში ეძებდნენ სიკვდილს. ყველა, ვისაც-კი შეეძლო იარაღის ტარება, განურჩევლად, ქუდოსანი თუ მანდილოსანი, უკანასკნელ სისხლის წვეთამდის იცავდა თავის სახლის კერას და მის დაცვაში ლევდა სულს...

წარო განადგურდა. შეუბრალებელმა მტერმა ქვა-ქვაზე აღარ დაანარჩუნა. სახლებს მისცა ნაღმი და მიანგრ-მოანგრია. ნანგრევები მორწყო პატრონების სისხლით. გადარჩა რამდენიმე უფრო მიუდგომელ ალაგას მდგარი სახლი. ბევრს ეცადნენ ლეკები, რომ ეს სახლებიც აეღოთ, მაგრამ ვერა და ვერ მიიტანეს ცეცხლის სანგალი.

მურთაზის ბძანებით ლეკებმა დაანებეს სახლებს თავი და შეუდგნენ ციხის აღებას. რამდენჯერმე ეცადა მურთაზი მიეტანა შეშის სანგალი, მაგრამ ყოველთვის ძვირად უჯდებოდა წადილი. დაიწყებდნენ სანგლის მიტანას თუ არა, ასტყდებოდა ციხიდან ცეცხლი და როგორც ბალახს, სცელოვდა მტერს.

ჯვარისაგან გაბრაზებულმა მურთაზმა, არ იცოდა, რა ექნა. დღე-ნახევარი გავიდა, რაც მიადგა ციხეს და ვერაფერი-კი ვერ დააკლო. მისი თავმოყვარეობა და სახელი ილახებოდა. როგორ?! ხანმა გამოგზავნა იგა, ამ ერთად ერთი ციხის ასაღებად და ისიც ვერ შესძლო?! სირცხვილი იყო მისთვის როგორც ხანის, ისე მთელი ჯარის და ავირის წინაშე!...

— ქანქანა გასთხარეთ ციხის საძირკვლამდინ და ნაღმი მიეცით! უბრძანა მხედართ-მთავარმა ჯარის კაცებს.

— ქანქანის გათხრა შეუძლებელია, უთხრეს მურთაზს, — ადგილი თითქმის პიტლო ქვიანია. ორ-სამ დღესაც ვერ გავთხრით.

— წყლით საიდან სარგებლობენ მეციხოვნეები? ჰკითხა მურთაზმა.

— ალაზნიდან.

— როგორ ეზიდებიან იმ სირღმიდან წყალს?

— ციხიდან მიწის ქვეშ თხრილი ჩაუდისთ ხევში.

— განა წყლის ზიდვა გალმიდან არ შეიძლება, რომ მოვასპობინოთ?

— გავსინჯეთ, ბევრიც ვათვალიერეთ, მაგრამ არ შეიძლება. წყლის მზიდავი არ სჩნდება, დაფარულია.

— მაშ მეტი გზა არ არის, ქანქანა უნდა გავიყვანოთ, სთქვა მხედართ-მთავარმა და მის თვლებში გესლის და შხამის ელვამ გაირბინა, — დაბნელება თუ არა უნდა შევეუდგეთ. სამი დღე მოგვიხდება, თუ მეტი, მაინც უნდა გავიყვანოთ. ციხის აულებლობა-კი არ შეიძლება.

დალამდა. ღამის წყვილიაღმა დაჰფარა ხუცის ციხე და მისი არემარე. მურთაზმა დააყენა ღამის დარაჯები და გასცა ბძანება, რომ შედგომოდნენ ქანქანის გათხრას. მთელი ღამე არ შეწყვეტილა მუშაობა. ადგილი მართლაც ისეთი ქვიანი აღმოჩნდა, რომ მთელ ღამის განმავლობაში რამდენიმე ადგილი მეტი ვერ გასჭრეს.

გათენდა.

— სანამ ქანქანას გავიყვანთ, ის დანარჩენი სახლებიც უნდა როგორმე გავანადგუროთ. სთქვა მურთაზმა და მიუსია ჯარი, მაგრამ როგორც ზემოდ იყო ნათქვამი, ის დანარჩენი რამდენიმე სახლი ისეთ მიუდგომელ ალაგზე იდგა, რომ მათი აღება ისე ადვილი არ იყო, ნამეტნავად იმ იარაღით, რა იარაღიც იყო იმ დროს. რამდენჯერმე მიიტანეს

იერიში ლეკებმა, მაგრამ ვერას ხდებოდა მათი გაშ-
მაგებელი მამაცობა.

შუაღლე იქნებოდა, როდესაც მურთაზის ბა-
ნაკში მოაგდო გაოფლიანებული ცხენი ერთმა
ლეკმა. მხედარი მყისვე ჩამოხტა ცხენიდან და წა-
რუდვა მურთაზს.

— სელიამ ალექიქუმ, ჩვენო სახელოვანო მურ-
თაზო! მიესალმა მხედარი მხედართ-მთავარს.

— ალექიქუმ სელიამ, ხანისაგან იქნები გამოგ-
ზანელი, უთხრა მურთაზმა, — როგორ ბძანდება,
ან საქმე როგორ მიდის?

— დიდებული ნუცალ-ხანის ხმალი ყოველ-
თვის გამარჯვებულია, აღფრთოვანებით უბასუხა ლეკ-
მა, და ეხლაც, მადლობა ალლაჰს, ძღვევა-მოსილია.

— კეთილი.

— სალაში დამაბარა შენთან, განაგრძო მცირე
დაფიქრების შემდეგ ლეკმა, — და დამაბარა ისაც,
რომ უმაღვე აჰყარო ჯარი და ფარსმაში შეუერთდე
ხანს.

— რა, რამე ხიფათი ხომ არ მოეღის ხანს?
მოუთბენლად ჰკითხა ლეკს მხედართ-მთავარმა.

— სოფელი გავანადგურეთ, სოქვა ლეკმა, —
მაგრამ სამი ციხე ჯერ-ჯერობით ვერ ავიღეთ. ყო-
ველი ღონისძიება ვიხმარეთ, მაგრამ ვერა გავაწყეთ
რა. ძალიან მაგარი ციხეებია, დააბოლოვა შიკრიკმა,
— და თავგანწირულადაც იცავენ თუშები.

მურთაზი ღუმილს მიეცა.

— არ იცი რისთვის მიბრძანებს ხანი? რამდენი-
მე ხანის შემდეგ ჰკითხა მხედართ-მთავარმა, და მი-
სი პატარა, ღრმად ჩაცვივნილი თვალები მიაშ-
ტრდნენ ლეკს.

— რა მოგახსენო, უთხრა ლეკმა, — ხანს
ვეგონებ ეშინიან, რომ აქა-იქა ციხეებიდან არ გა-
მოვიდნენ თუშები და შეერთებულის ძალით მოუ-
ლოდნელად თავს არ დაგეცნენ. ცოტა ჯარი გყავს
და სიშორის გამო ფარსმიდან იმ დროზე მოშველე-
ბაც ძნელია.

— ჰემმარიტია, სოქვა მხედართ მთავარმა, —
მიზეზი ეგ იქნება. საზოგადოდ ჯარის დანაწილება
საშიშია. თუმცა, ამპარტავნად დაუმატა მურთაზმა,
— თუშები ვერას ვაჰბედავენ ჩემზე მოსვლას, ჩემ-
თან გულ-და-გულ ბრძოლას...

მურთაზმა ვასცა ბრძანება, რომ ბრძოლა შე-
ეწყვიტათ. იმედ-გაცრუებული, გაბრაზებული ლე-
კები გავიდნენ წაროდან, გადალახეს ნაყაივეროს
მთა და ფარსმაში შეუერთდნენ ნუცალის ჯარს.

შეერთებულ ძალით უფრო თამამად მიატანეს
იერიში ლეკებმა ფარსმის სამ ციხეზე, მაგრამ ამაო
იყო მათი გაშმაგებული გულოვნობა.

— ქანქანის გაყვანა არ სცადეთ? ჰკითხა ხანს
მურთაზმა.

— იმ ორ ციხის ქვეშ გაყვანა თითქმის შეუძ-
ლებელია, სოქვა ავარიის მბრძანებელმა, — ალაგი

უხერხოა და ამ წინა მიწის ქვეშ-კი გუშინ დაიწყეს,
ხვალ დილისთვის უთუოდ მორჩებიან.

— ძალიან გვაზიანებენ ეს დაწყებული ცი-
ხეები, უთხრა ხანს მურთაზმა. ბევრი ვეცადეთ, რომ
ავგელო წაროს ციხე, მაგრამ ვერა გავაწყეთ რა...
მეომრებიც ბევრი დაგვიხოცეს.

სოფელი ხომ გაანადგურეთ?

— როგორ არა, გავანადგურეთ. მხოლოდ
რამდენიმე ერთ მიუდგომელ დაკიდულ ფერდოზე
მღვარი სახლი გადავკრჩა.

— ზარალი დიდი გვაქვს, ნაღვლიანად წარ-
მოსტქო რამდენიმე ღუმილის შემდეგ ნუცალ-ხანმა,
— თუ თითო ციხეს ამოდენა ხალხი ვუმსხვერპლეთ,
ბოლოს ჩვენ ჯარი აღარ დაგვრჩება. რომ მცოდ-
ნოდა, რომ თუშები ამისთანა წინააღმდეგობას გა-
ვიწვევდნენ, მეტ ჯარს მოვიყვანდი.

— მაშ სხვა რა ღონისძიება ვიხმაროთ ამ თუ-
შების დასამორჩილებლად, სოქვა მურთაზმა, — მეტი
წილი ხალხისა ციხე-სიმაგრეებში არის შეხიზნული.

— როგორც გითხარი ხვალ დილისთვის ქან-
ქანას გაიყვანენ წინა ციხის ძირს. უთხრა ნუცალ-
მა, — მივცეთ ნაღბი და თუ მაინცა და მაინც ვერ
ავიღეთ, დავანარჩუნოთ აქ რამდენიმე ჯარი და და-
ნარჩენით დავბანაკდეთ სოფელ გირევის ვაკეზე,
იქიდან შეუსიოთ ჯარი აქა-იქა სოფლებს, გავანად-
გუროთ და გადავწვათ. გადავწვათ რაც რამ ჰირნა-
ხული აბადიათ. გავუშვათ თარეში აქა-იქა მთებზე
ციხრის ასაღებად. დეე ისხდნენ თავიანთ ციხე-სი-
მაგრეებში, დაასრულა ავარიის ხანმა, — და გადა-
ჰყურონ გადამწვარ და გაოხრებულ თავიანთ ქვეყა-
ნას. მერე როდემდისინ?!

გათენდა მეორე დღე. ამოვიდა მზე და ისევ
ისე მხიარულად გაანათა პირიქით თუშეთი, და
მისი თოვლიან-ყინულიანი ქედი. მოჰხვდა პირველი
სხივი ფარსმის წინა ციხეს და მის საჭირკველის
ქვეშიდან იგრვინა ნაღბმა. ციხეს შეერყა ტანი და
ერთ მის კედელს ძირი გამოენგრა. ყიყინით მიიტა-
ნეს იერიში გახარებულმა ლეკებმა; წინ მიუძღოდათ
მედროშე. გავარდა ციხიდან პირველი თოფი.
ტყვიამ გადატეხა დროშის ჯოხი და დროშასთან
ერთად გაენტხა მიწას ციხის წინ თვით მედრო-
შეც...*) ეს თოფი იყო ნასროლი კახოს თინასაგან,
რომელსაც ჩეეცო ვაჟაკის ტანისამოსი, აესხა ია-
რალი და ვაჟაკებთან ერთად მისჯდომოდა სათო-
ფურეს.

სიხარულის ყიყინა დასცეს თუშებმაც რა დაი-
ნახეს მიწაზე გაშლარაული მედროშე და გატეხი-
ლი მისი დროშა. ტყვიით მტრის დროშის გადატე-
ხა ნიშნავდა, თუშების რწმუნებით, იმას, რომ გა-
მარჯვება ბოლოს თუშებს დარჩებოდათ. ამ ნიშანმა

*) თუშების გადმოცემით.

მისცა იმედი, უფრო გაამხნევა და გააგმირა ციხის მეომრების გული და სული...

მედროშის მოკვლით უკან არ დაიწიეს ლეკებმა: პირიქით უფრო მედგრად მიიწიეს ციხისაკენ. კახოს თინას თოფს მიჰყვა ციხის ყველა სათოფურებიდან გრიალი. უწყალოდ იხოცებოდნენ ლეკები, მაგრამ მაინც გულოვნად მივიდნენ ციხის გამონგრეულზე. დააპირეს შესვლა ციხეში, მაგრამ გამონანგრევში დაუხვდნენ მეციხოვნენი. ასტყდა საშინელი ხმლის და ხანჯლის ტრიალი. კარგად იცოდნენ თუშებმა, თუ რა ბოლო მოსდევდა ლეკების ციხეში შესვლას. ამისათვის შექუჩდნენ იმ გამონგრეულ ალაგას და გაშმაგებულად იცავდნენ შესავალს.

ორივე მხარე მედგრად იბრძოდა, ლეკები ცდილობდნენ, რომ როგორმე შესულიყვნენ ციხეში, ამოეხოცნათ მეციხოვნენი, მიეცათ ციხისათვის ცეცხლი და მათ თავს ზარი დაეცათ ორ დანარჩენ ციხესაც. მხოლოდ თუშები იცავდნენ თავიანთ კერას, თავიანთ ცოლშვილს, მოხუც დაუძლურებულ დედ-მამას, თავიანთ საყვარელ მამულს, მის ღიდებას და თავისუფლებას... და ამისათვის, რასაკვირველია, რომ უფრო თამამად უხვდებოდნენ სიკვდილს, უფრო გულამღვრეულად, გაშმაგებულად ეკვეთებოდნენ მტერს... ყოველ ციხის დამცველს ჩალად არ მიაჩნდა იმ დროს სიკვდილი. რა იყო მისთვის იმ დროს სიკვდილი, როდესაც უკან-შიგნით ციხეში მისი ცოლ-შვილი. მოხუცი დედ-მამა უმზერდა მას, უმზერდა, როგორც იმედს, როგორც თავის მფარველს?!.. უნდა ეყურებინა ვაჟკაცს, როგორ შევიდოდნენ ლეკები ციხეში და სიცილ-ხარხარით, უშვერი სიტყვებით გამორეკავდნენ, როგორც ნახირს და სამარცხვინოდ წარუდგენდნენ ნუცალ-ხანს? არა... ამისთანა სამარცხვინო სიცოცხლე მას არ უნდოდა და არც შეეძლო აეხილა თვალები სამზეოს. ჯიშათაც არ მოსდევდა მას იმისთანა სიცოცხლე... მას დაჰყურებდნენ მისი წინაპრების სისხლით მორწყული, საფლავებით მოკენჭილ მშობლიური მთები, მათი ამწვანებულ კალთები და კლდე-ღრეები!...

მედგარი იყო ბრძოლა ციხის გამონანგრევთან. ერთმა ლეკმაც ვერ გადადგანაბიჯი შიგნითკენ, სანამ ერთი უკანასკნელი მეციხოვნე ვაჟკაცთაგანს პირში სული ედგა. მტრის მახვილით განგმირული დავარდა ეს უკანასკნელიც და გაღსდებულ მტერს თავისუფალი გზა მიეცა ციხეში შესასვლელად, კახოს თინამაც სხვა ვაჟკაცებთან ერთად დალია სული სასიკვდილო ბრძოლაში.

გამხეცებული მტერი შევიდა ციხეში და დაინახა მანდილოსნები და ბავშვები აუბრთ თუ არა, თამამად მივიდა დააპირა ნახირსავით გამორეკა ციხიდან. მაგრამ მოტყუვდა. აქაც ვერ გადარჩა უსისხლოდ. სიკვდილმა აქაც გაშალა თავის მძლავრი ფრთები. იძრეს მანდილოსნებმა ხანჯლები და გაშმაგებული ეკვეთნენ ლეკებს, მაგრამ ბევრ ხანს ვერ გასტანა. რამდენიმე დაჭრილ-დაჩეხილი მანდილოსანი და მტრალი ბავშვები ჩაუვარდნენ მტერს

კოცხალნი, დანარჩენებმა-კი იქვე ჰპოვეს ცივი სმარე. მუჯღლუგუნის კვრით, ცემით და თრევით გაიყვანეს ლეკებმა ტყვეები და წარუდგენეს მტერს ხანს.

— რად გინდათ, რა თავში იხლით, გაუწყრა თავის მეომრებს ხანი, გაუშვით, საითაც უნდათ, წავიდნენ.

ციხეს ცეცხლი მისცეს ლეკებმა და რაც დასაწველი იყო დახოცილ გვამებთან ერთად ნაცარფერფლად გარდაიქცა. დარჩნენ მხოლოდ ცეცხლის ალისაგან გაშვეებული, ჩარდახ ჩამოქცეული კედლები...

დანარჩენი ორი ციხე ვერ აიღო ნუცალმა, სოფელი-კი მიანგრ-მოანგრია და ქვა-ქვაზე აღარ დაანარჩუნა. ნუცალმა ფარსმაში ჩააყენა რამდენიმე ასი კაცი, რომ თვალ-ყური ღე ეჭირათ იმ გადარჩენილ ორ ციხეზე და დანარჩენ ჯარით გადავიდა სოფელ გირევი და დაბანაკდა მის გაშლილ ფართო ვაკეზე.

გირევიდან ნუცალ-ხანმა შეუსია ჯარები ახლო-მახლო სოფლებს, ხოლო ციხე-სიმაგრეებისათვის ხელი არ უნდა ეხლოთ. რამდენიმე სოფელი მიწასთან გასწორდა. თუშები მაინც თავს არ უხრიდნენ ავარიის მბრძანებელს. ჯავრისაგან არ იცოდა რა ექნა ნუცალს. დრო გადიოდა. ერთ დილას გასცა ბრძანება ხანმა:

— როგორც ვხედავ, თუშები ქედს არ გვიხრიან. მაშ დეე იღვაროს სისხლი... ხოცეთ, ელიტეთ, ვინც ურჩობდეს; ნუ დაინდობთ ნურც დიდს, ნურც პატარას, ნურც ქუდოსანს და ნურც მანდილოსანს!... სოფლები გაანადგურეთ, ქონება ცეცხლს მიეცით, გაუშვით თარეში მთებზე, ამოხოცეთ მწყემსები და მათი ცხვარი წამორეკეთ!..

ლეკებიც მუყაითად ასრულებდნენ თავიანთ ბატონის ბრძანებას. დადიოდნენ და თარეშობდნენ აქა-იქა მთებზე, ჰხოცავდნენ მწყემსებს და ცხვარი წამოუდიოდათ ბანაკში.

ბოლოს და ბოლოს შეწყუხდა ქვეყანა. რამდენიმე აშენებული სოფელი მიწასთან გასწორდა. მისი მცხოვრებნი ამოწყდნენ უთანასწორო სასიკვდილო ბრძოლაში და მით ჰპოვეს სამარე მამა-პაპის კერასთან, მხოლოდ მიწის მაგივრად მათ დაეხურათ თავიანთივე სახლების ნანგრევები!... აქა-იქა მთებზე სკურავდნენ თავიანთივე სისხლში ცხვრებსავით თავგანწირული წყემსები. მშობლების და თანამომეგების გლოვის ნაცვლად თავს დაჰყუდნენ მათ ლეშით დამძღარნი, გაღაღებულნი სვავ-ყორნები. მათი ერთგული დაობლებული ქოფაკები წამოსკუპებულებიყვნენ აქა-იქა მთის ქუდურა-გორაკებზე და საცოდავად გულ-მოსაკლავად დაჰღმუოდნენ. მათ ღმუილის ხმას აძლევდნენ დაღვრემილი, გულ-ჩათხრობილი შავი კლდეები და უერთდებოდა მათ ქვეშ თვალ-ჩაუწვდენელ უფსკრულში მჩქეფარე წყლების გაშმაგებული ღრიალი.

თუშეთის მღულარე სიცოცხლის მდინარე თითქო შეწყვეტილიყო და სიკვდილი გამეფებულიყო... შეწყდა ხმაურობა სოფლებში. მიჩუმდა და მიყუჩდა არე-მარე. აღარსად სჩანდა მთებზე თეთრად გაშლილი ცხვრის ფარა და აღარ ისმოდა „ვით გლოვას ზარი“ მწყემსების სალამურის ტკბილი ლულუნი...

ივ. ბუქურაული.

რედაქტორ-გამომცემელი: პეტრე სურგულაძე.